

मरकुस

लिख्यो सुब-समिचार

लिखवा वाळो: मरकुस

लिखवा की वजा: मसीह,
यहोवा को सेवक

लिखवा को बखत: करीव
५०-६८ ईस्वी सन्

मरकुस ईसु का पेलांपेल का चेलाहुंण माय से नी थो। उ तो यरुसलेम निवासी (परेरितहुंण १२.१२), सिमोन पतरस को साती (१ पतरस ५.१३), अने बरनाबास का काका जायो भई थो (कुलुस्सिहुंण ४.१०), जो बखत आवा पे पोलुस अने यरुसलेम का परेरितहुंण का गेले काम करवा वाळो बणी ग्यो। परेरितहुंण का साते काठो नातो होवा की वजासे उ ईसु मसीह का जीवन, अने सुरु का मसीही लोगहुंण का कामहुंण का बारामें जाणकारी दे हे।

ईस्वी सन् ११२ की सुरुआत की मण्डळी का अगवा पपीयास ने मरकुस की लिखी पोथी के पतरस को अनुवादक बताइयो। परेरितहुंण १०.३६-४३ माय द्या परबचन को मिलाण मरकुस का सुब-समिचार से करवा पे परगट होय हे के पतरस को उ परबचन ईसु की जिनगी की एक रुप-रेखा हे जेके लई के मरकुस ने बड़ा रुप माय बखाण क्यो हे। मरकुस ने अपणो यो सुब-समिचार खास करिके रोम नगर माय रेवा वाळा लोगहुंण सरु लिख्यो, अने ईसु के सेवक याने यहोवा का सेवक का रुप माय परगट क्यो। फेर उने सुब-समिचार के याने इनी पोथी के, "परमेसर का बेटा ईसु मसीह को सुब-समिचार से सुरु क्यो हे।" उने इनी सुब-समिचार की पोथी माय ईसु के एक सेवक जो हक से भ्र्यो हे उके काम करवा वाळा मनख का रुप माय परगट क्यो हे। इका माय ईसु खुद के "परमेसर को बेटो" के हे। सुरु की मण्डळी को इतयास अने ईसु का जीवन को बखाण मरकुस ने रोम माय लिख्यो थो।

रुप-रेखा:-

या रुपरेखा ईसु का जीवन के उकी सेवकई माय करी गी जातराहुंण का रुप माय लिखी हे अने ईसु के एक सेवक याने परमेसर का सेवक का रुप माय, "काम माय लाग्यो रेणो" की वजासे कइका बी मनख पे इको असर होय हे।

१. भूमिका १.१
२. सुरु की घटनाहुंण १.२-१३

३. गलील की पेली जातरा १.१४-४.३४
(अचरज का काम अने मिसाळहुंण)।
४. दिकापुलिस की जातरा ४.३५-५.४३
५. गलील की दूसरी जातरा ६.१-२९
६. ईसु एखला माय ६.३०-५२
७. गलील की तीसरी जातरा ६.५३-७.२३
८. धरउ देस की जातरा ७.२४-९.२९
दुःख-भोग का बारामें पेली कावा केणो ८.३१
९. गलील की चौथी जातरा ९.३०-५०
दूसरी कावा दुःख-भोग का बारामें केणो ९.३१
१०. पीरिया अने गलील की जातरा १०.१-५२
तीसरी कावा दुःख-भोग का बारामें केणो १०.३३,३४
११. यरुसलेम माय सेवा ११.१-१३.३७
१२. दुःख-भोगणो अने मोत माय से जिन्दो होणो १४.१-१६.२०

ईसु का दूत की तय्यारी

(मती ३.१-१२; लूका ३.१-१८; योहन १.१९-२८)

परमेसर को बेटो^a ईसु मसीह का
 १ सुब-समिचार की सुरुआत।^२ जसाके
 यसायाह नबी ने परमेसर आड़ी से क्यो
 के,

"देख हूं थारा अगड़े अपणो दूत
 मोकलुं,

जो थारो रस्तो तय्यार करेगा;

३⁺ मांळ माय हेला पाडवा वाळा को
 यो हेलो,

'परभु को रस्तो तय्यार करो,
 उकी बाटहुंण सुदी करो।"

४ योहन बपतिसमो देवा वाळो पापहुंण
 की मांफी सरु हिरदो बदळवा का

बपतिसमा को परचार करतो मांळ माय
 आयो।^b ५ अने यहूदिया का आखा इलाका
 का अने यरुसलेम का सगळा रेवासी
 उका कने हित्याया, अने अपणा पापहुंण
 के मानी के यरदन नदी माय उकासे
 बपतिसमो लेवा लाग्या।

६⁺ योहन तो ऊंट का रूवां का लतरा
 पेर्या करतो अने कमर माय चामड़ा को
 कमरपेटो बान्दया करतो अने टिड्डिहुंण
 अने सेत खाया करतो थो। ७ अने यो
 केतो परचार कर्या करतो थो, "म्हारा
 बाद एक आवा वाळो हे, जो म्हार से
 घणो सामरती हे, अने हूं उकी पन्नी
 उठाइवा लायक बी हयनी। ८ म्हने तो
 तमारे पाणी से बपतिसमो^c द्यो, पण उ
 तमारे पवितर आतमा से बपतिसमो देगा।

^a १.१ थोडाक हात का लिख्या होया लेख माय परमेसर को बेटो नी हे।

^b १.४ योहन बपतिसमो

देवा वाळो ... मांळ माय आयो; कई लेखहुंण माय असो हे योहन बपतिसमा देवा वाळो, परचार करतो
 मांळ माय परगट्यो। ^c १.८ बपतिसमो; सबद् भण्डार माय देखो।

^f १.२: मलाकी ३.१

^f १.३: यसायाह ४०.३

^f १.६: २ राजा १.८

ईसु को बपतिसमो अने उकी अजमाइस

(मती ३.१३-४.११; लूका ३.२१-२२; ४.१-१३)

९उना दनहुंण माय असो होयो के ईसु ने गलील का नासरत इलाका से अई के योहन से यरदन नदी माय बपतिसमो ल्यो। १०अने जसेज उ पाणी से बायरे हिट्यो तो उने असमान के खुलतो होयो अने आतमा के कबुतर सरीको अपणा अदरे उतरतो देख्यो; ११+ जदे सरग से या अवाज अई: "तू म्हारो परमिलो बेटो, हूं थार से घणो खुस हूं।"

१२अने आतमा ने झट उके मांळ माय जावा सरु उकसाइयो। १३अने चाळीस दन तक मांळ माय उकी अजमाइस सेतान से होती री अने उ वां मांळ जनावर का गेले र्यो अने सरगदूत उकी सेवा-टेल करता था।

पेलांपेल चेलाहुंण के तेइणो

(मती ४.१२-२२; लूका ४.१४-१५; ५.१-११)

१४योहन के बन्दी बणाया जावा का बाद ईसु तो परमेसर का राज को सुब-समिचार सुणातो होयो गलील आडी आयो। १५+ अने यो केवा लाग्यो, बखत पूरण होयो, अने परमेसर को राज कने हे, हिरदो बदळो अने सुब-समिचार पे बिसास करो।"

१६जदे उ गलील का सरवर का कराडे-कराडे जई र्यो थो, तो उने सिमोन अने उका भई अन्द्रियास के सरवर माय जाळ लाखता देख्या, क्योके वी भोई था। १७ईसु

ने उणका से क्यो, "म्हारा पाछे चलो, हूं तमारे मनखहुंण का भोई बणउंवां।" १८वी झट जाळहुंण छोड़ी के उका पाछे चली पइया।

१९थोडाक अगडे बडवा पे उने जब्दी का बेटा याकूब अने उका भई योहन के नाव माय जाळ सांधता देख्या। २०उने झट उणके तेइया; अने वी अपणा दाइजी जब्दी के मजुर्याहुंण का गेले छोड़ी के उका पाछे चली पइया

ईसु बायरबादा के बायरे हेडे

(लूका ४.३१-३७)

२१फेर वी कफरनहूम सेर-गांम माय आया, अने झट सबत् का दन उ पराथनाघर^d माय जई के परबचन देवा लाग्यो। २२+ अने लोग उका परबचन से चकित होया, क्योके उ उणके सासतरिहुंण सरीको नी, पण हक से परबचन दई र्यो थो।

२३उणाज बखत उणका पराथनाघर माय एक मनख जेके बायरबादा^e लागी थी। वा या कई के चिल्लाडी, २४हे ईसु नासरी, हमारे थार से कई काम? कई तू हमारे नास करवा आयो? हूं जाणूं तू कुंण हे - परमेसर को पवितर जणो!"

२५ईसु ने उके डांटी के क्यो, "छानी रे, अने उका माय से हिटी जा।"

२६तो बायरबादा उके मरोडी के उंची अवाज से चिखती हुई उका माय से हिटी गी। २७वी सगळा दंग रई गया, अने माय-माय तरक-बितरक करता होया केवा

^d १.२१ पराथनाघर; अराधनालय। ^e १.२३ बायरबादा; बायरे की हवा, बुरी आतमा, दुस्त आतमा।

^f १.११: उत्पत्ती २२.२; भजन संहिता २.७; यसायाह ४२.१; मती ३.१७, १२.१८; मरकुस ९.७; लूका ३.२२

^g १.१५: मती ३.२ ^h १.२२: मती ७.२८-२९

लाग्या, "या कई बात हे? हक का साते नवी सीख! उ बायरबादा के हुकम दे अने वी उकी माने हे।"

२८तो उका बारामें यो समिचार जदेज गलील का ऐरे-मेरे का आखा इलाका माय फेली गयो।

ईसु नरा लोगहुंण के नज करे

(मती ८.१४-१७; लूका ४.३८-४१)

२९वी पराथनाघर से हितवा का बाद झट याकूब अने योहन का गेले सिमोन अने अन्दि्रयास का घरे आया। ३०वां सिमोन की सासु बुखार माय पड़ी थी; अने उणने झट उका बारामें ईसु के बताइयो। ३१ईसु ने उका कने अई के उको हात पकड़ी के उठाड़ी। उको बुखार उतरी गयो, अने वा उणकी सेवा करवा लागी।

३२सांज का बखत, दन अथणवा का बाद लोग सगळा बेमारहुंण के अने जिणका माय बुरी आतमाहुंण भरई थी ईसु कने लावा लाग्या। ३३अने आखो नगर का फाटक पे भेळो हुई गयो। ३४उने नरा के नरी-तरा की बेमारिहुंण से जो दुःख्या था, नज कर्या, अने नरी बुरी आतमाहुंण के हेडी; अने उ बुरी आतमाहुंण के बोलवा को हुकम नी देतो थो। क्योके वी जाणती थी के उ कुंण हे।

एखला माय पराथना

(लूका ४.४२-४४)

३५परोडे जदे इन्दारोज थो उ उठ्यो अने बायरे हिटी के एखला माय गयो अने

वां पराथना करवा लाग्यो। ३६तो सिमोन अने उका साती उके दुंडवा लाग्या। ३७अने उणने उके पई के क्यो, "सगळा लोग थारे दुंडी र्या हे।"

३८उने उणकासे क्यो, "आव, हम हजु कई ऐरे-मेरे की बस्तिहुंण माय जावां, के हूं वां बी परचार करी सकूं; क्योके हूं इकासरु आयो हूं।"

३९ तो उ आखा गलील माय अने यहूदिहुंण का पराथनाघरहुंण माय जई के परचार करतो अने बायरबादाहुंण के हेडतो र्यो।

कोइया के नज करनॉ

(मती ८.१-४; लूका ५.१२-१६)

४०एक कोइयो उका कने आयो अने उका सामे गोडा टेकी के उकासे बिणती करिके केवा लाग्यो। "अगर तू चावे तो म्हारे सुद्ध करी सके।"

४१ईसु ने उका पे तरस^६ खई के अपणो हात अगडे कर्यो अने उकासे चॉटई के क्यो, "हूं चउं; तू सुद्ध हुई जा।" ४२अने झट उको कोइ खतम हुई गयो अने उ सुद्ध हुई गयो। ४३फेर उने काठी चेतावणी दई के उके झट मोकली द्यो, ४४ ईसु ने उकासे क्यो, "देख, कइंका से कइंनी केणो, पण जई के अपणे खुद के पुरोहित के बताइ उ साबित करे अने सुद्ध होवा का बारामें मूसा नबी ने जो कई हुकम द्यो उको चडावो चडा जेकासे पुरोहितहुंण पे गवई रे।"

४५पण उ बायरे हिटी के इका बारामें यां तक परचार करवा लाग्यो के ईसु

† १.४० म्हारे सुद्ध करी सके; इनी (कोड) व्यादी से जो मनख हे उके सासतर का मुताबिक असुद्ध मान्यो जातो थो। ‡ १.४१ तरस; थोडाक मूळ माय करोध।

† १.३९: मती ४.२३, ९.३५ ‡ १.४४: लेव्यव्यवस्था १४.१-३२

पाछो खुले-आम कइंका नगर माय जई नी सक्यो, पण मांळ माय र्यो; फेर बी चारी-मेर से लोगहुंण उका कने आता र्या।

लकवा का रोगी के नज करनौं

(मती ९.१-८; लूका ५.१७-२६)

२ नरा दन बाद जदे ईसु पाछो कफरनहूम नगर आयो तो सुण्यो के उ घर माय हे। २अने नरा लोगहुंण भेळा हुई ग्या यां तक के कमांड का बायरे तक बी जगा नी थी, अने उ उणके परबचन सुणई र्यो थो। ३तो लोग लकवा का एक बेमार के चार मनखहुंण से उठाडी के उका कने ल्याया। ४पण जदे भीड़ की वजासे उका कने जई नी सक्या, तो वी घर पे फेर्या खापराहुंण के जां ईसु थो हटाइवा लाग्या; अने जदे उणने हटाडी के जगा बणई ली, तो उनी खाट के जेका पे लकवा को बेमार पड़्यो थो, निच्चे उतारी। ५अने ईसु ने उणको बिसास देखी के उना लकवा का उना बेमार से क्यो, "हे बेटा, थारा पाप मांफ हुई ग्या।"

६वां की जागे थोड़ाक सासतरी बेठ्या अपणा हिरदा माय तरक-बितरक करी र्या था। ७"यो मनख असो कायसरु बोले? यो तो परमेसर की बुरई करी र्यो; परमेसर का अलावा हजु कुंण पाप मांफ करी सके हे?"

८ईसु ने झट अपणा आतमा माय यो जाणी के, के वी अपणा हिरदाहुंण माय असतरा तरक-बितरक करी र्या, उणकासे

क्यो, "तम कायसरु अपणा हिरदाहुंण माय इनी बातहुंण का बारामें तरक-बितरक करी र्या हो? ९सरल कंई हे, इना लकवा का बेमार से यो केणो के, 'थारा पाप मांफ होया' या यो के, उठ्या, अने अपणी खाट उठाडी के चल'?" १०पण इकासरु के तम जाणो के हूं मनख का बेटा^h के इनी धरती पे पाप मांफ करवा को हक हे, "उने लकवा का मार्या से क्यो, ११"हूं थार से कूं, 'उठ्या' अपणी खाट उठाइ अने घरे चल्यो जा।"

१२उ उठ्यो अने झट अपणी खाट उठाडी के सगळा लोगहुंण का देखता होया बायरे चल्यो ग्यो; अने वी सगळा दंग रई ग्या अने परमेसर की म्हेमा करता होया केवा लाग्या, "असो तो हमने कदी नी देख्यो।"

लेवी के तेइणो

(मती ९.९-१३; लूका ५.२७-३२)

१३उ पाछो बायरे हिटी के सरवर कराइ ग्यो, अने बडीमेक भीड़ उका कने अइरी थी, अने उ उणके परबचन देतो थो।

१४जाता बखत उने हलफई का बेटा लेवी के चुंगी-चोकी माय बेठ्यो देख्यो, अने उने उकासे क्यो, "म्हारा पाछे हुई जा।" उ उठ्यो अने ईसु का पाछे चली पड़्यो।

१५फेर असो होयो के जदे उ लेवी का घरेⁱ जिमी र्यो थो तो नरा चुंगी वसुळवा वाळा अने पापी बी, ईसु अने उका चेलाहुंण का गेले जिमी र्या था; क्योके वी नरा था अने उका पाछे चली पड़्या

^h २.१० मनख का बेटा; सबद् भण्डार माय देखो। माय।

ⁱ २.१५ लेवी का घरे; या उका (या ईसु की) घर

था। १६जदे फरीसिहुंण^१ माय से थोड़ाक सासतरिहुंण^२ ने देख्यो के उ पापिहुंण अने चुंगी लेवा वाळा का गेले जिमी र्यो तो उका चेलाहुंण से केवा लाग्या, "ईसु चुंगी लेवा वाळा अने पापिहुंण का गेले कायसरु खाय-प्ये?"

१७यो सुणी के ईसु ने उणकासे क्यो, "अच्छा-भला के बेद की जरुवत हयनी, पण बेमारहुंण के हे। हूं धरमिहुंण के नी, पण पापिहुंण के तेडवा आयो हूं।"

ईसु से बरत का बारामें सवाल

(मती ९.१४-१७; लूका ५.३३-३९)

१८योहन का चेलाहुंण अने फरीसी बरत राख्या करता था; अने वी अई के ईसु से केवा लाग्या, योहन का चेलाहुंण अने फरीसिहुंण का चेलाहुंण तो बरत राखे, पण थारा चेलाहुंण कायसरु बरत नी राखे?"

१९ईसु ने उणकासे क्यो, "जदत्तक लाडो बरात्याहुंण का गेले रे, तो कई बरात्या बरत राखे? जदत्तक लाडो उणका गेले रे वी बरत नी राखी सके। २०पण वी दन आयगा जदे लाडो उणकासे इकाड़ी कर्यो जायगा अने जदे वी उना दन बरत राखेगा।

२१नवा लतरा को थेगळो जूना लतरा पे कई को नी लगाडे; नी तो थेगळो उका माय से खेंची लेगा याने नवो जूना माय से अने उ पेलां से बी बती फाटी जायगा।

२२नवा अंगूर रस के जूनी मसखहुंण माय कई को नी भरे, नी तो अंगूर रस मसखहुंण फाड़ी लाखेगा अने अंगूर रस अने मसखहुंण दोइज नास हुई जायगा; पण नवो अंगूर रस नवी मसखहुंण माय भर्यो जाय हे।"

सबत् अने मनख

(मती १२.१-८; लूका ६.१-५)

२३† असो होयो के उ सबत् का दन खेतहुंण माय से हुई के जई र्यो थो, अने उका चेलाहुंण चलता-चलता; उम्बी तोडवा लाग्या। २४‡ अने फरीसिहुंण उकासे केवा लाग्या, देख, "ई असो काम कायसरु करे जो सबत् का दन^१ करनां अच्छो हयनी?"

२५† तो उने उणकासे क्यो, "कई तमने कदी असो नी बांच्यो के जदे दाऊद राजा^३ अने उका सातिहुंण के भूक लागी अने उके जरुवत हुई तो दाऊद ने कई कर्यो? २६‡ उने कसे अबियातार म्हापुरोहित^४ का बखत माय, परमेसर का मन्दर माय जई के चड़ावा का रोटा खाया जिणके खाणो पुरोहित का अलावा कइंका के ठीक नी थो, अने उने अपना सातिहुंण के बी दई द्या?"

२७फेर उने उणकासे क्यो, "सबत् को दन मनख सरु बणायो, नी के मनख सबत् सरु। २८इकासरु हूं मनख को बेटो सबत् को बी मालेख हूं।"

१ २.१६ फरीसिहुंण; सबद् भण्डार माय देखो। २ २.१६ सासतरिहुंण; नेम-बिधान का सीखावा वाळा।

३ २.२४ सबत् का दन; यहूदिहुंण को पवितर छुट्टी को दन। इना दन माय कइंज नी करे, सिरप पराथना घर माय जई के अराधना-उपासणा करे। ४ २.२५ दाऊद राजा; यहूदिहुंण का पुराणा बखत को राजो। ५ २.२६ अबियातार म्हापुरोहित; दाऊद राजा का बखत को म्हापुरोहित।

† २.२३: नेम-बिधान २३.२५ ‡ २.२५-२६: १ सेमुएल २१.१-६ † २.२६: लेव्यव्यवस्था २४.९



सरवर का कराड़े परबचन (MRK ३.९)

सुक्या हात वाळा के नज करनॉ

(मती १२.९-१४; लूका ६.६-११)

३ अने ईसु पाछो पराथनाघर माय गयो। वां एक मनख थो जेको हात सुकी गयो थो। २फरीसिहुंण उका पे दोष लगाइवा सरु उकी हेर माय था के देखां, उ सबत् का दन उके नज करे के नी। ३ईसु ने सुक्या हात वाळा मनख से क्यो, "उठ्या, अदाइ माय सगळा का सामे उबी जा।" ४उने उणकासे क्यो, "सबत् का दन भलो करनॉ ठीक हे के बुरो करनॉ, पराण बचाइणो के घात करनॉ?"

पण वी छाना र्या। ५उने चारी आडी उणके गुस्सा से देख्यो अने उणका हिरदा का काठापण पे दुःखी हुई के उने उना मनख से क्यो, "अपणो हात सामे कर, "उने उके सामे कर्यो, अने उको हात नज हुई गयो ६अने फरीसी पराथनाघर से बायरे हिट्या अने झट ईसु का बिरोद माय हेरोदियाहुंण० का गेले मनसुबो करवा लाग्या के कसतरा ईसु के नास करां।

ईसु का पछड़े भीड

७ईसु अपना चेलाहुंण का गेले सरवर आडी चलयो गयो। गलील से एक बडीमेक भीड उका पाछे चली अने यहूदिया इलाका, ८यरुसलेम नगर, इदुमिया नगर, यरदन नदी का पेलां पार अने सूर अने सेदा कस्बा का ऐरे-मेरे से वी बडी भीड उका सगळा काम का बारामें सुणी के उका कने अई। ९ उने अपना चेलाहुंण से क्यो, "भीड की वजासे एक नाव उका सरु तय्यार राखी जावे जेकासे के भीड उके घेरी नी ले, १०क्योंके उने नरा के नज कर्या था, इनी वजासे वी सगळा जो रोगी था, उकासे चोंटवा सरु उका चारी-मेर धक्का-मुक्की करी र्या था। ११अने जदे कदी बुरी आतमाहुंण उके देखी लेती तो उका अगड़े पडी जाती, अने चिल्लाडी के केती थी, "तू परमेसर को बेटो हे।"

१२अने उ उणके घडी-घडी चेताइया करतो थो के उके नी परगटे।

बारा चेलाहुंण के सेवा सरु छांटणो

(मती १०.१-४; लूका ६.१२-१६)

१३फेर उ परबत पे चडी गयो अने जिणके चाया उणके अपना कने बुलाइया, अने वी उका कने आया। १४तो उने उणका माय से बारा चेलाहुंण के छांट्या के वी उका गेले रे अने उ उणके परचार करवा सरु मोकले, १५अने

० ३.६ हेरोदियाहुंण; राजनेतिक पालटी जो करीब ईसु मसीह का बखत यहूदियुंण सरु बणी थी जो हेरोदेस को समर्थन करती थी क्योंके हेरोदेस रोमी राजपाल थो।

१ ३.९-१०: मरकुस ४.१; लूका ५.१-३

उणके बुरी आतमाहुंण के हेडवा को हक दयो।

१६ फेर उने इना बाराहुंण के छांट्या: सिमोन, जेको नाम उने पतरस राख्यो, १७ अने जब्दी को बेटो याकूब, अने याकूब को भई योहन जिणको नाम उने बुअनरगिस याने गरजन का बेटा राख्या; १८ अने अन्द्रियास, अने फिलिप्पुस, अने बरतुलमे, अने मती अने थोमा, अने हलफई को बेटो याकूब अने तद्दई, अने सिमोन कनानी,^p १९ अने यहूदा इस्करियोती, जेने उके पकडवई बी लाख्यो थो।

ईसु अने बालजबूल

(मती १२.२२-३२; लूका ११.१४-२३, १२.१०)

२० अने उ घरे आयो अने फेर एक असी घणी बडीमेक भीड भेळी हुई के ईसु अने उका चेलाहुंण रोटा बी नी खई सक्या। २१ जदे ईसु का कुटम का लोगहुंण ने यो सुण्यो, तो उके पकडवा सरु निकळ्या, क्योके उणको केणो थो के, "उको चित ठिकाणे ह्यनी।"

२२[†] तो सासतरी जो यरुसलेम से आया था, कई र्या था, "उका माय बालजबूल याने सेतान भरायो हे, अने उ बुरी आतमाहुंण का परधान की मदद से बुरी आतमाहुंण के हेडे हे।"

२३ तो ईसु ने उणके अपणा कने बुलाइया अने उणकासे मिसाल माय केवा लाग्यो, "सेतान कसे सेतान के हेडी सके? २४ अगर कइका राज मायज फाड

पडी जाय, तो उ राज जम्यो नी रे। २५ अगर घर माय फाड पडी जाय तो उ घर बण्यो नी रे। २६ अने अगर सेतान अपणोज बिरोदी हुई जाय अने उका माय फाड पडी जाय, तो उ बण्यो नी रेगा, पण यो उको अंत रेगा।

२७ पण कई को मनख कईका ताकतवर मनख का घर माय भरई के उकी धन-सम्पती नी लुटी सके, जदतक के उ उना ताकतवर मनख के पेलों बान्दी नी लाखे। इका बादज उ उको घर लुटेगा।

२८ हूं तमार से खास बात कूं, मनखहुंण की सन्तान का सगळा पाप अने निंदा^q जो वी करे मांफ कर्या जायगा, २९[†] पण जो कई को पवित्तर आतमा का बिरोद माय निंदा करे उके कदीज मांफ नी कर्यो जायगा, पण उ सदा सरु पाप को दोषी ठेराइयो जाय हे।" ३० क्योके वी यो कई र्या था, के "उका माय बुरी आतमा हे।"

ईसु का चेलाज सांचा परवार

(मती १२.४६-५०; लूका ८.१९-२१)

३१ तो उकी मेतारी अने उका भई-बेनहुंण वां पौंच्या, अने बायरे उबा हुई के उके तेडवा सरु मोकल्यो। ३२ अने भीड उका चारी-मेर बेठी थी, अने उणने उकासे क्यो, "देख, थारी मेतारी अने थारा भई-बेनहुंण बायरे थारे दुंडी र्या हे।"

३३ उने जुवाब द्यो, "म्हारी मेतारी अने म्हारा भई-बेनहुंण कुंण?" ३४ अने उने

^p ३.१८ सिमोन कनानी; या सिमोन जेलोतेस; उ राजनेतिक कट्टरपंथी पालटी को सदस्य थो।

^q ३.२८ निंदा; या बुरी बातहुंण केणो; या परमेसर का बिरोद माय निंदा करनो।

[†] ३.२२: मती ९.३४, १०.२५ [†] ३.२९: लूका १२.१०

चारी-मेर वां बेठ्या होया लोगहुंण आडी नगे करिके क्यो, "देखो! म्हारी मेतारी अने म्हारा भई-बेनहुंण! ३५क्योंके जो कई को परमेसर की मरजी पे चले, उज म्हारो भई अने म्हारी बेन अने म्हारी मेतारी हे।"

बीज बोणे वाळा की मिसाल

(मती १३.१-९; लूका ८.४-८)

† उ पाछो सरवर कराडे परबचन देवा लाग्यो। अने उका कने घणी बडीमेक भीड भेळी हुइगी के उ सरवर माय एक नाव पे चडिके बेठी ग्यो, अने आखी भीड सरवर का कराडे जमीन पे उबी री। ३६सु मिसाल माय उणके नरी बातहुंण सीखाइवा लाग्यो अने उ अपणा परबचन माय उणकासे कई र्यो थो,



बीज बोणे वाळो (MRK ४.३)

३ "सुणो! देखो, एक बीज बोणे वाळो बीज बोणे हिटयो। ४जदे उ बोई र्यो थो तो थोडाक बीज बाट का मेरे पड्या अने चिरकलिहुंण ने अई के उणके चुगिल्या। ५अने थोडाक बीज भाटाळी जमीन पे पड्या जां उणके जादा गारो नी मिळ्यो, अने गेरो गारो नी मिळवा की वजासे वी झट उग्याया, ६अने जदे दन उग्यो तो भुळसई ग्या अने जड नी पकडवा की वजासे सुकई ग्या। ७थोडाक बीज कांटाळी झांडी माय पड्या अने झांडिहुंण ने छई के उणके दाबी लाख्या, अने उणका माय फळ नी लाग्या। ८पण थोडाक बीज अच्छी जमीन माय पड्या, जदे वी उगी के बदया अने फळदार हुई के कइंका तीस गुणा, कइंका साट गुणा अने कइंका सो गुणा फळ लाया।"

९अने उ कई र्यो थो, "जिणका कने सुणवा सरु कान होय, वी सुणी ले।"

मिसालहुंण को उदेस

(मती १३.१०-१७; लूका ८.९-१०)

१०जसेज उ एखलो रई ग्यो, तो उका मानवा वाळा अने बारा चेलाहुंण उकासे मिसाल का बारामे पुछवा लाग्या। ११उने उणकासे क्यो, "तमार पे तो परमेसर का राज को भेद परगट्यो हे, पण बायरे वाळाहुंण सरु हरेक बात मिसाल माय करी जाय हे, १२जेकासे के वी देखता होया तो देखे पण सुज नी पडे, अने सुणता होया तो सुणे

† ४.१: लूका ५.१-३

† ४.१२: यसायाह ६.९-१०

पण समजी नी सके,
कई असो नी होय के
वी पलटे अने मांफी पई
जाय।"

मिसाल को अरथ

(मती १३.१८-२३; लूका ८.९-१०)

१३ फेर उने उणकासे क्यो, "कई तम या मिसाल नी समज्या? तो फेर सगळी मिसालहुंण के कसे समजोगा? १४ बोणे वाळो बचन बोय। १५ अने ई वी हे जो बाट का मेरे का, जां बचन बोयो जाय अने जदे वी सुणे, तो सेतान झट अई के बोया बचन के उठई लई जाय। १६ असतरा ई लोग बीज बोया भाटाळी जमीन सरीका हे। जदे वी बचन के सुणे हे तो झट उके खुसी से मानी ले हे, १७ वी अपणा माय गेरी जड नी राखे अने थोडाज बखत सरु रे, पण जदे बचन की वजासे उणका पे संकट या सताव आय तो वी झट ठोकर खाय हे। १८ अने थोडाक वी बीज, जो कांटाळी झांडी माय बोया उनी जमीन पे पड्या बीज सरीका, जो बचन के सुणे तो हे। १९ पण संसार की चिन्ताहुंण अने धन को धोको अने दूसरी चीजहुंण को लोभ उणका माय भरई के बचन के दाबी लाखे अने उ बिना फळ को हुई जाय हे। २० अने ई वी बीज हे जो अच्छी जमीन पे बोया बीज सरीका हे अने वी बचन के सुणे अने उके माने अने तीस गुणो, साट गुणो अने सो गुणो फळ लाय हे।"

सरावला की मिसाल

(लूका ८.१६-१८)

२१+ उ उणकासे कई र्यो थो, "कई सरावला के इकासरु लावे के उके टोपली या खाट निच्चे धरे? कई इकासरु नी लावे के उके सरावला की जगा पे धरे? २२+ क्योके कई बी छिप्यो ह्यनी जो परगट नी कर्यो जाय; नीज कई गुपत हे जो उजाळा माय नी आवे। २३ अगर कईका कने सुणवा का कान होय तो उ सुणी ले।"

२४+ फेर ईसु ने उणकासे क्यो, "चोकन्ना रो के कई सुणो हो। जेना मांप से तम मांपो हो उना मांप से तमारा सरु मांप्यो जायगा; अने इका से बी बती तमारे द्यो जायगा। २५+ क्योके जेका कने हे उके हजु द्यो जायगा; अने जेका कने नी हे, उकासे जो कई उका कने हे उ बी लई ल्यो जायगा।"

बीज की मिसाल

२६ उने क्यो, "परमेसर को राज असो हे जसे कई को मनख जमीन पे बीज लाखे, २७ अने राते सोइ जाय अने दन माय जागी जाय अने उ बीज अंकुर्या हुई के बदे - उ जणो खुद नी जाणे के यो कसे होय। २८ जमीन अपणा आप फसल उपजावे, पेलां अंकुर्या, उका बाद उम्बी, अने फेर उम्बी माय तय्यार दाणा। २९+ पण जदे फसल पाकी जाय, तो उ झट

† ४.२१: मती ५.१५; लूका ११.३३

† ४.२२: मती १०.२६; लूका १२.२

† ४.२४: मती ७.२; लूका ६.३८

† ४.२५: मती १३.१२, २५.२९; लूका १९.२६

† ४.२९: योएल ३.१३

दरांतो लगाय, क्योके काटवा को बखत अई गयो।"

रई का दाणा की मिसाल

(मती १३.३१-३२,३४; लूका १३.१८-१९)

३०अने ईसु ने उणकासे क्यो, परमेसर का राज को मिलाण हम किकासे करां, या कां की मिसाल से हम इको बखाण करां? ३१उ रई का बीज सरीको हे। जदे उ जमीन माय बोयो जाय हालाके जमीन का सगळा बीजहुण से नानो रे, ३२फेर बी जदे उ बोयो जावे तो उगी के बगीचा का सगळा झाड़हुण से मोटो हुई जाय, अने उका माय मोटी-मोटी डगाळहुण हिटे, जेकासे के असमान का पखेरु बी उका छायाळा माय बसेरो करी सके हे।"

३३ईसु उणके असी नरी मिसाल से बचन सुणातो थो। जितरा वी समजी सकता था। ३४अने उ मिसाल बिना उणकासे कइनी बोलतो थो, पण एखला माय अपणा चेलाहुण के सगळो कई समजातो थो।

लेरहुण अने अन्दी-दंदवाळ के थामणो

(मती ८.२३-२७; लूका ८.२२-२५)

३५उणाज दन जदे सांज हुई तो उने उणकासे क्यो, "आव, हम उना पार चलां। ३६अने भीड़ के छोड़ी के उणने जसो उ थो उके अपणा गेले नाव पे चडई ल्यो अने वां उणका गेले हजु बी नावहुण थी। ३७तो एक घणी तेज अन्दी-दंदवाळ अने लेरहुण नाव से टकरांवां लागी यां तक के नाव माय पाणी भरावा लाग्यो।

३८अने उ खुद नाव का पाछल्या हिस्सा माय गादी पे सोइर्यो र्यो थो, अने चेलाहुण ने उके जगाइयो अने क्यो, "हे गरु, कई थारे फिकर हयनी के हम नास हुई रया हे?"

३९तो जागी जावा पे उने अन्दी-दंदवाळ के डांट्यो अने सरवर से क्यो, "सांत रे, थमी जा!" अने अन्दी-दंदवाळ थमी ग्यो अने सगळो कई सांत हुई ग्यो। ४०उने उणकासे क्यो, "तम इतरा डर्या होया कायसरु हो? या कसी बात के तमारा माय बिसास हयनी?"

४१अने वी घणा डर्या होया अने माय-माय केवा लाग्या, "यो हे कुण के अन्दी-दंदवाळ अने लेरहुण बी उको हुकम माने हे?"

बायरबादा के हेडणो

(मती ८.२८-३४; लूका ८.२६-३९)

ईसु मसीह अने उका चेलाहुण सरवर का पेलांपार गिरासेनियो का इलाका माय पोंच्या। २अने जदे ईसु नाव पे से उतर्यो तो झट एक जणो जेका माय बायरबादाहुण थी, कबरहुण माय से हिटी के उकासे मिळ्यो। ३उ कबरहुण माय रेतो थो, अने कई को बी उके सांकळहुण से बान्दी के नी राखी सकतो थो, ४क्योके डोल्डा अने सांकळहुण से तो उके हमेस्या बान्दयो थो, पण उ सांकळ के तोडी लाखतो, अने डोल्डाहुण के बटका-बटका करी लाख्या करतो थो, अने कई को इतरा ताकतवर नी थो के उके काबु माय करी लेतो। ५उ लागाबन्दी से दन-रात

४.३०: परमेसर का राज; सबद् भण्डार माय देखो।

कबरहुंण माय अने बळ्ढा माय चिखतो अने भाटाहुंण से खुद के लोई लुवांण करतो थो।

६३ दूरा से ईसु के देखी के दोइयो, अने नमिके उके परणाम करवा लाग्यो। ७ अने जोर से चिल्लाडी के उने क्यो, "परम परधान परमेसर को बेटो ईसु, म्हारे थार से कंई काम? हूं थारे परमेसर की सोगन दूं के म्हारे सताडे मती!" ८ "क्योंके ईसु उकासे कई र्यो थो, "हे बुरी आतमा, इना मनख माय से हिटी जा!"

९ ईसु ने उकासे पुछ्यो, "थारो नाम कंई हे?"

उने उकासे क्यो, "म्हारो नाम 'टोळो' हे; क्योंके हम नरा हे।" १० अने उने ईसु से गिडगिडई के बिणती करी, के हमारे इना इलाका से बायरे मती मोकल।

११ वां बळ्ढा पे सुंवल्डाहुंण को एक मोटो टोळो चरी र्यो थो। १२ अने उणने उकासे बिणती करिके क्यो, "हमारे उना सुंवल्डाहुंण माय मोकली दे के हम उणका माय भरई जावां।" १३ उने उणके हुकम दई द्यो। बुरी आतमाहुंण उका माय से हिटी के सुंवल्डाहुंण माय भरई गी। अने सुंवल्डाहुंण को टोळो जो करीब दो हज्जार को थो कराड़ा पे से झप्ट्यो, अने सरवर माय पडी के डुबी मर्यो।

१४ उणका ग्वाळाहुंण ने दोडी के नगर अने गांमहुंण माय यो समिचार सुणायो, अने जो कंई होयो थो उके लोग देखवा सरु १५ ईसु कने आया, अने उना मनख के जेका माय बुरी आतमा थी याने उकेज जेका माय टोळो भरायो थो, लतरा पेर्यो अने सुदो बेठ्यो देख्यो अने वी डरी गया। १६ जिणने यो देख्यो थो उणने बुरी आतमा

से सताइया मनख अने सुंवल्डाहुंण का बारामें सगळो कंई जो होयो थो, उणके सुणायो।

१७ लोगहुंण ईसु से अपणा इलाका माय से चल्या जावा सरु बिणती करवा लाग्या।

१८ अने जदे उ नाव माय चडवा लाग्यो तो उ मनख जो पेलां बुरी आतमा से सताइयो होयो थो बिणती करवा लाग्यो, के म्हारे अपणा गेले रेवा दे।

१९ पण ईसु ने उके आवा नी द्यो अने क्यो, "अपणा लोगहुंण कने घरे जा अने उणके बताड के परभु ने थारा सरु कसा बडा काम कर्या हे, अने उने थार पे कसी दया करी।

२० उ चलयो ग्यो अने दिकापुलिस जेके दस नगरहुंण को इलाको के हे का माय परचार करवा लाग्यो, के ईसु ने म्हारा सरु कसा बडा काम कर्या; अने सगळा अचरज करवा लाग्या।

मरी नानी अने बेमार बइरा

(मती ९.१८-२६; लूका ८.४०-५६)

२१ जदे ईसु नाव से पाछो उना पार ग्यो, तो एक बडीमेक भीड़ उका चारी-मेर भेळी हुई गी, अने उ सरवर का कराडे रुकी ग्यो। २२ फेर पराथनाघर का हाकिमहुंण माय याईर नामको एक जणो आयो अने ईसु के देख्यो अने उका पगे पडी ग्यो, २३ अने गिडगिडई के उकासे बिणती करिके केवा लाग्यो, "म्हारी नानी छोरी मरवा पे हे। किरपा करिके चली के उका पे हात धर के वा नज हुई जाय अने जिन्दी रे।"

२४ ईसु उका गेले चलयो, अने बडीमेक भीड़ बी उका पाछे चली पडी, यां तक के लोग उका पे हिटी पडता था।

२५ एक बड़रा थी जेके बारा बरस से लोई बीवा की बेमारी थी, २६ अने जेने नरा बेदहुंग का हाते दुःख उठाइयो थो, अने अपणो सगळो कंई खरच करवा पे बी उके कंई फायदो नी होयो थो पण हजु बेमार हुई गी थी। २७ उने ईसु का बारामें सुणी के, भीड़ माय से उका पाछे अई के उका चोळा के हात लगाड़ी लाख्यो। २८ क्योँके वा केती थी, "अगर हूं उका लतरा सेज चोँटी जउंवां तो नज हुई जउंवां।"

२९ अने झट उको लोई बिणो बन्द हुई गयो, अने उने अपणी काया माय म्हेसुस कर्यो के हूं अपणा रोग से नज हुई गी हूं। ३० उनीज घड़ी ईसु ने यो म्हेसुस कर्यो के म्हारा माय से सामरत हिटी हे, उने भीड़ माय पाछे फरिके पुछ्यो म्हारा लतरा से कुण चोँट्यो?"

३१ उका चेलाहुंग ने उकासे क्यो, "तू तो देखीज र्यो के भीड़ थार पे हिटी पड़ी री हे, अने तू के हे 'थार से कुण चोँट्यो'?"

३२ तो उने उनी बड़रा के जेने यो कर्यो थो देखवा सरु चारी-मेर नगे करी। ३३ पण वा बड़रा जो कंई उका गेले होयो थो उके जाणी के डरती अने धुजती हुई अई अने उका सामे हिटी पड़ी, अने उने सगळो कंई सांची-सांची बताड़ी द्यो। ३४ ईसु ने उकासे क्यो, "नानी, थारा बिसास ने थारे नज कर्यो। खुसी से जा अने अपणी इनी बेमारी से बची रे।"

३५ उ या कई के जइज र्यो थो, जदेज पराथनाघर का हाकिम का घरे से लोगहुंग ने अई के क्यो, "अबे गरु के

हजु तकलीफ कायसरु दई र्यो - थारी नानी तो मरी गी हे?"

३६ पण ईसु ने उनी बात के सुणी ली^९ अने पराथनाघर का हाकिम से क्यो, "डरे मती सिरप बिसास राख।" ३७ अने उने पतरस, अने याकूब अने याकूब का भई योहन के छोड़ी के, दूसरा कईका के अपणा गेले आवा नी द्या। ३८ अने वी पराथनाघर का हाकिम का घरे आया, तो उने लोगहुंग के मजमा लगाइता अने जोर से रोता अने कळाप करता देख्या। ३९ तो उने भितरे जई के उणकासे क्यो, "कायसरु रोव अने बेदा करो? नानी मरी हयनी पण सोइर्यो री हे।"

४० अने वी उकी मसकरी करवा लाग्या पण सगळा के बायरे हेड़ी के नानी का मां-बाप अने अपणा सातिहुंग के लई के अने उनी उफरी पे जां नानी थी भितरे गया। ४१ अने नानी को हात पकड़ी के ईसु ने उकासे क्यो, "तलीथा कूमी!" जेको अरथ, हे नानी, हूं थार से कूं, उठ्या!"

४२ अने नानी झट उठी के चलवा-फरवा लागी, क्योँके वा बारा बरस की थी अने वी घणा दंग रई गया। ४३ उने उणके काठो हुकम द्यो के इनी बात के कई को जाणणे नी पाय, अने उने क्यो, "नानी के थोड़ोक खावा सरु द्यो जाय।"

ईसु अपणा नगर माय आयो

(मती १३.५३-५८; लूका ४.१६-३०)

अने वां से हिटी के उ अपणा नगर
 ६ माय आयो, अने उका चेला उका पाछे-पाछे चली पड़्या। २ अने जदे सबत्

^९ ५.३६ उनी बात के सुणी ली; याने उनी बात के ध्यान नी द्यो; या जोर से सुणी ल्यो।

को दन आयो तो ईसु पराथनाघर माय परबचन देवा लाग्यो, अने सगळा सुणवा वाळा दंग हुई के केवा लाग्या, इना मनख के ई बातहुण कां से अइगी अने यो कसो ज्ञान जो इके द्यो, अने इका हात से कसा अचरज का काम परगट होय हे? ^३कई यो उज सुतार हयनी जो मरियम को बेटो अने जो याकूब, योसेस, यहूदा, अने सिमोन को भई कई उकी बेनहुण यां हमारा माय हयनी?" अने लोगहुण ने उकी वजासे ठोकर खई।

^४ ईसु ने उणकासे क्यो, "नबी के अपणा नगर अने परवार, अने अपणा घर का अलावा हजु कई मान नी पड़्यो जाय।

^५थोडाक बेमारहुण पे हात धरी के उणके नज करवा का अलावा उ वां हजु कई को अचरज को काम नी करी सक्यो। ^६ईसु के उणका अबिसास पे घणो अचरज होयो, फेर उ गांम-गांम परबचन देतो फर्यो।

ईसु ने अपणा चेलाहुण के परचार सरु मोकल्या

(मती १०.५-१५; लूका ९.१-६)

^७बारा चेलाहुण के तेडी के उने उणके दो-दो करिके अने बुरी आतमाहुण पे हक दई के मोकल्या, ^८ अने उणके हुकम द्यो के अपणी जातरा सरु वी लाकडी का अलावा हजु कइंनी ले; नी तो रोटा,

नी झोळी, अने नी कमरपेटा माय पइसा, ^९पण चप्पल पेरनो, अने यो बी क्यो, दो दो कमीज नी पेरनो।" ^{१०}ईसु ने उणकासे क्यो, "जां कई तम कइका घर माय जाव, तो नगर छोडवा तक वांज रो। ^{११} अने जां तमारे लोग माने हयनी या तमारी नी सुणे, तो वां से हितता बखत तम अपणा पग की पगथळिहुण को धूळो झटकी लाखो के उणका बिरोद सरु गवई रे।"

^{१२}अने उणने जई के परचार कर्यो के हिरदो बदळो। ^{१३} अने वी नरी बुरी आतमाहुण के हेडवा अने नरा बेमारहुण पे तेल मळी के उणके नज कर्या करता था।

हेरोदेस को बिचार: ईसु योहन हे

(मती १४.१-१२; लूका ९.७-९)

^{१४} राजा हेरोदेस^१ ने बी ईसु का बारामें सुण्यो, क्योके उको नाम परसिद्ध हुई चुक्यो थो; अने लोग या कई र्या था, "योहन बपतिसमा देवा वाळो मर्या माय से जी उठ्यो, इकासरु ई ताकतहुण उका माय काम करी री हे।"

^{१५}पण थोडाक लोग कई र्या था, उ एलियाह नबी^२ हे।"

अने दूसरा कई र्या था, उ नबी हे, पुराणा बखत का नबिहुण सरीको एक।"

^{१६}पण जदे हेरोदेस राजा ने यो सुण्यो तो उ केतो र्यो, योहन जेको माथो म्हने कटवाइयो, जी उठ्यो हे।"

^१ ६.१४ राजा हेरोदेस; हेरोदेस अन्तिपास; गलील इलाका को राजो। ^२ ६.१५ एलियाह नबी; एक असो मनख जो ईसु मसीह से नरा साल पेलां होयो थो अने उ परमेसर का बारामें लोगहुण के बताइतो थो।

^३ ६.४: योहन ४.४४

^४ ६.८-११: लूका १०.४-११

^५ ६.११: परेरितहुण १३.५१

^६ ६.१३: याकूब ५.१४

^७ ६.१४-१५: मती १६.१४; मरकुस ८.२८; लूका ९.१९

बपतिसमा देवा वाळा योहन की हत्या

(मती १४.१-१२; लूका ९.७-९)

१७[†] हेरोदेस ने तो खुद लोगहुंण के मोकली के योहन के पकड़वायो अने जेळ माय लाखी द्यो थो, क्योके हेरोदेस ने अपणा भई फिलिप्पुस की घराळी हेरोदियास से ब्याव कर्यो थो। १८ योहन तो हेरोदेस से क्या करतो थो, "थारे अपणा भई की घराळी के राखणो थारा सरु नेम-बिधान मुजब हयनी।"

१९तो हेरोदियास उकासे बेर राखती थी अने चाती थी के उके मरवाई लाखे; पण असो नी करी सकी, २० क्योके हेरोदेस या जाणी के योहन से डरतो थो के उ एक धरमी अने पवित्तर जणो हे, अने उकी रक्सा करतो थो। अने जदे उ योहन की सुणतो थो तो घणो घबरई जातो थो, फेर बी खुसी से सुण्या करतो थो।

२१ अने ठीक मोको जदे आयो जदे हेरोदेस ने अपणा जनम दन पे परधानहुंण, सेनापतिहुंण अने गलील का खास मनखहुंण के भोज माय नोत्या था। २२ अने जदे खुद हेरोदियास की बेटी[†] भित्तरे अई के नाची अने उने हेरोदेस अने उका पांमणाहुंण के खुस कर्या, जदे राजा ने राजकुमारी से क्यो, "तू जो चावे म्हार से मांग, हूं थारे दूवां।" २३ अने उने सोगन खई के क्यो, "तू म्हार से आदो राज तक मांगिले, हूं थारे दूवां।"

२४ उने बायरे जई के अपणी मेतारी हेरोदियास से पुछ्यो, "हूं कई मांगू?"

मेतारी ने क्यो, "योहन बपतिसमा देवा वाळा को माथो!"

२५ वा झट दोडती हुई राजा कने भित्तरे अई के बिणती करवा लागी, "हूं चउं के तू योहन बपतिसमा देवा वाळा को माथो एक परात माय धरी के अबी म्हारे दई दे।"

२६ जदके राजो घणो उदास होयो, फेर बी अपणी सोगन अने दरबारहुंण की वजासे उ उकी बिणती के टाळी नी सकतो थो। २७ राजा ने झट एक जल्लाद के मोकल्यो अने हुकम द्यो के उको माथो काटी ल्याय। उने जई के जेळ माय उको माथो काट्यो, २८ अने उके परात माय धर्यो अने लई के राजकुमारी के द्यो अने राजकुमारी ने अपणी मेतारी के। २९ जदे योहन का चेलाहुंण ने यो सुण्यो तो जई के उकी लोथ के लई गया अने उके कबर माय धरी।

ईसु ने पांच हज्जार लोगहुंण के जिमाइया

(मती १४.१३-२१; लूका ९.१०-१७; योहन ६.१-१४)

३० परेरितहुंण ईसु कने अई के भेळा होया अने जो कंई उणने कर्यो अने सीखाइयो थो, सगळा को बखाण कर्यो। ३१ ईसु ने उणकासे क्यो, "आव, अने एखला माय चली के थोडोक-घणो अराम करी लो" - क्योके वां नरा लोग अइ-जई र्या था, यां तक के उणके जिमवा को बी मोको नी मिळतो थो। ३२ तो वी एखला नाव पे चडिके बियाबान माय चल्या गया।

[†] ६.२२ हेरोदियास की बेटी; कई लेखहुंण माय असो लिखो हे उकी बेटी हेरोदियास।

[†] ६.१७-१८: लूका ३.१९-२०

३३अने लोगहुंण ने उणके जाता देख्या अने नरा ने उणके ओळखी ल्या, अने सगळा नगर से लोग पगेपग दोड़ी के उणकासे पेलांज उनी जगा पे जई पोंच्या। ३४+ अने नाव से उतरी के उने बड़ीमेक भीड़ के देखी अने उणका पे उके तरस आयो क्योके वी बिना ग्वाळा की गाडरहुंण सरीका था जिणको कई को रखवाळो नी रे; अने उ उणके नरी बातहुंण सीखाइवा लाग्यो। ३५जदे दन नरो अथणी ग्यो तो उका चेला उका कने आया अने केवा लाग्या, "या जगा बिराण हे अने दन नरो अथणी चुक्यो हे; ३६इणके जावा दे के वी ऐरे-मेरे की बस्तिहुंण अने गांमहुंण माय जई के अपणा सरु कई खावा को मोल लई ले।"

३७पण उने जुवाब दई के क्यो, "तमीज उणके कई खावा बले दो!"

उणने उका से क्यो, "कई हम जई के दो सो चांदी का सिक्काहुंण" का रोटा मोल लांवां अने इणके खावा सरु दां?"

३८उने उणकासे क्यो, "तमारा कने कितरा रोटाहुंण हे? जई के देखो।"

उणने मालम करिके क्यो, "पांच - अने दो मच्छीहुंण।"

३९अने उने सगळा के हुकम द्यो के जिमवा सरु पंगत माय लिल्ली घांस पे बेठी जाय। ४०अने लोग पचास-पचास अने सो-सो की पंगतहुंण माय बेठ्या। ४१उने पांच रोटा अने दो मच्छीहुंण के लई अने सरग आडी देखता होया उणका पे आसीस मांगी अने रोटा तोड्या अने

चेलाहुंण के द्या के वी उणके बांटे। अने उने दो मच्छीहुंण के बी उना सगळा मनख माय बाटी लाखी। ४२अने उण सगळा ने धापी के खायो ४३अने रोटा का कोळ्या अने मच्छी से भर्या होया बारा टोपळाहुंण उठाइया। ४४अने रोटा खावा वाळा मनखहुंण की गिणती पांच हज्जार थी।

ईसु पाणी पे चल्थो

(मती १४.२२-३३; योहन ६.१५-२१)

४५तो उने झट चेलाहुंण के नाव पे चडवा अने अपणा से पेलां बेतसेदा का दूसरा आडी जावा को क्यो, जदके उ खुद भीड़ के बिदा करवा लाग्यो। ४६अने जदे उ उणके बिदा करी चुक्यो तो उ परबत पे पराथना करवा सरु चल्थो ग्यो। ४७जदे सांज हुई तो नाव सरवर का अदाड माय थी, अने ईसु कराडा पे एखलो थो। ४८जदे उने उणके घणा म्हेनत से खेता देख्यो, क्योके बायरो उणका सामे को थो, तो रात का करीब चोथा पेर ईसु उणका कने सरवर का पाणी पे चलतो होयो आयो, अने उणका से अगडे हितणो चायो* ४९पण जदे उणने उके सरवर पे चलतो देख्यो तो समज्या के भूत हे अने चिल्लाडी उठ्या: ५०क्योके सगळा ने उके देख्यो अने डरी गया था

पण उने झट उणकासे बातहुंण करी अने क्यो, "हिम्मत राखो: हूँ हे, डरो मती।" ५१तो उ उणका साते नाव पे चडी ग्यो, अने अन्दी-दंदवाळ थमी ग्यो,

* ६.३७ चांदी का सिक्काहुंण; एक चांदी को सिक्को एक दन की मजुरी थो। (देखो मती २०.२)।

x ६.४८ उणका से अगडे हितणो चायो; या उणका माय भेळो होणो।

f ६.३४: गिणती २७.१७; १ राजा २२.१७; २ इतयास १८.१६; यहजेकेल ३४.५; मती ९.३६

अने वी घणा दंग होया, ^{१३}क्योंके रोटा की घटना से कइनी समज्या था क्योंके उणका हिरदा काठा हुई ग्या था।

ईसु गन्नेसरत माय बेमारहुण के नज करे

(मती १४.३४-३६)

^{१३}तो वी पार हुई के गन्नेसरत का कराड़ा पे पौंची के घाट पे नाव लगाड़ी ^{१४}अने जदे वी नाव से उतर्या, तो लोगहुण ने झट उके पेचाणी ल्यो, ^{१५}अने आखा परदेस माय चारी आड़ी जां बी सुण्यो के उ हे, उनी-उनी जगा पे दोड़ी-दोड़ी के बेमारहुण के खाट पे ल्या फर्या। ^{१६}अने गांमहुण, नगरहुण या बस्तिहुण माय जां कइं उ जातो थो, लोग बेमारहुण के हाट-बजार माय राखी के उकासे बिणती करता था के उ उणके अपना लतरा का किनोर सेज चोंटवा दे; अने जितरा उकासे चोंटता था, वी नज हुई जाता था।

मनख नेम से परमेसर को नेम-बिधान म्हान हे

(मती १५.१-९)

तो फरीसी अने थोडाक सासतरी ^७ जो यरुसलेम से आया था ईसु का चारी-मेर भेळा होया। ^२अने उणने ईसु का कइं-कइंका चेलाहुण के (जसो रिवाज थो के खावा से पेलं हात धोणो चाय) बिना हात धोया रोटा खाता देख्या।

^३(क्योंके फरीसी अने सगळा यहूदी तदत्तक नी खाता था जदत्तक के वी अच्छी-तरा हात धोई नी लेता था; अने असतरा वी पूरखाहुण की रीति पे चलता था - ^४जदे वी हाट-बजार से आवे, तो जदत्तक खुद के पाणी से साफ नी करी ले, जिमता नी था;^५ अने असा नरा दूसरा रीति-रिवाज बी उणके पाळण करवा सरु मिळ्या था, जसेके, बाटकाहुण, गाग्र्याहुण, तांबा का ठामडाहुण के धोणा अने मांजणा।)

^५फरीसिहुण अने सासतरिहुण ने उकासे पुछ्यो, "असो कइं हे के थारा चेला पूरखाहुण की रीति मुजब नी चले अने बिना धोया हात से रोटा खाय हे?"

^६उने उणकासे क्यो, "यसायाह नबी^२ ने तमारा ढोंगीहुण सरु ठीकज भविसबाणी करी थी, जसो के लिख्यो हे, 'ई लोग होंटहुण से तो म्हारो मान राखे,

पण इणका हिरदा म्हार से दूरा रे।

^७ई बेकार म्हारी उपासणा करे, अने मनखहुण की सीखहुण के धरम का सिद्धांत करिके सीखाडे हे।'

^८परमेसर को हुकम टाळी के तम मनखहुण की रीति को पाळण करो हो।"

^९उने उणकासे यो बी क्यो, "तम अपना रीति को पाळण करवा सरु

^१ ७.४ खुद के पाणी से साफ नी करी ले, जिमता नी था; या जदे बी कइं हाट-बजार माय से आतो थो तो सगळा से पेलं उ पाणी से सुद्ध करतो थो।

^२ ७.६ यसायाह नबी; ईसु मसीह से करीब ७५०

सो बरस पेलं यहूदिहुण को जूनो नबी थो।

^३ ७.६-७: यसायाह २९.१३

^४ ७.७: यसायाह २९.१३

परमेसर को हुकम कितरी अच्छी तरा टाळी दो हो! ^{१०} क्योके मूसा ने क्यो, 'अपणा पिता अने अपणी मेतारी को मान राखजो'; अने जो कई को पिता अने मेतारी के बुरो के, उ मारी लाख्यो जाय।' ^{११}पण तम को हो, अगर कई को मनख अपणा पिता अने अपणी मेतारी से के, 'म्हार से तमारे जो कई बी फायदो हुई सकतो थो उ "बलिदान" याने परमेसर के दई द्यो हे,' ^{१२}तो तम असा मनख के उका पिता अने मेतारी सरु कई बी करवा नी दो,' ^{१३}असतरा तम परमेसर का बचन के अपणी रीति से जो तमने ठेरई टाळो हो अने तम नरो असोज काम करो हो।"

मनख के असुद्ध बणावा वाळी चीजहुंण

(मती १५.१०-२०)

^{१४}अने भीड़ के पाछी अपणा कने बुलाड़ी के, ईसु लोगहुंण से केवा लाग्यो, "तम अबे म्हारी सुणो अने समजो: ^{१५}असी कइंकी चीज हयनी जो मनख माय बायरे से भरई के उके खराब करे; पण जो चीजहुंण मनख माय से बायरे हिटे हे, वीज हे जो उके खराब करे हे। ^{१६}(अगर कइंका का सुणवा का कान होय तो सुणी ले।)"^१

^{१७}अने जदे भीड़ के छोड़ी के उ घर माय आयो, तो उका चेलाहुंण ने इनी मिसाल का बारामें उकासे पुछ्यो। ^{१८}उने उणकासे क्यो, "कई तम इतरी बी समज नी राखो? कई तम नी देखो के जो

कई बायरे से मनख माय जाय हे, उ उके खराब नी करी सकतो? ^{१९}क्योके उ उका हिरदा माय नी पण उका पेट माय जाय अने उ बायरे हिटी जाय"। (असतरा उने सगळी जिमवा की चीजहुंण के सुद्ध ठेरई)

^{२०}फेर उने क्यो, "जो मनख माय से हिटे उज मनख के खराब करे। ^{२१}क्योके भितरे से याने मनखहुंण का हिरदा माय से बुरा बिचार, ब्योबिचार, चोरीपणो, घात, परई नार, ^{२२}लोभ, अने बुरा काम अने दुस्तता, छळ-कपट, अनेती, जळण, चुगली, गुमान, निंदा, गुमान अने मूरखता हिटे हे। ^{२३}ई सगळी बुरइहुंण भितरे से हिटे हे अने मनख के खराब करे हे।"

गेर यहूदी बइरा की मदद

(मती १५.२१-२८)

^{२४}अने वां से उठी के ईसु सूर अने सेदा का इलाका आड़ी चलयो ग्यो। अने जदे उ एक घर माय ग्यो तो नी चातो थो के कई को यो जाणे; फेर बी उ छिपी नी सक्यो। ^{२५}पण उका बारामें सुणी के एक बइरा जेकी नानी बेटी माय बायरबादा थी, झट अई के उका पण पे हिटी पडी। ^{२६}या बइरा यूनानी अने सुरुफिनीकी जात की थी। अने वा उकासे घडी-घडी बिणती करवा लागी के म्हारी नानी माय से बुरी आतमा हेडी दे। ^{२७}ईसु ने उकासे क्यो, "पेलां बाळकहुंण के धापवा दे, क्योके बाळकहुंण का रोटा लई के कुतराहुंण का अगडे लाखणो ठीक हयनी।"

^१ ७.१५ थोडाक मूळ लेख माय १६ आयत के जोडी हे। (देखो ४.२३)।

^२ ७.१०: निरगमन २०.१२, २१.१७; लेख्यवस्था २०.९; नेम-बिधान ५.१६

२८पण उने जुवाब द्यो, "सांची परभु, पण खावा की जगा से कुतरा बी तो बाळकहुंण का ऐंठवाडा पे पळे हे।

२९ईसु ने उकासे क्यो, "इना जुवाब का वजासे चली जा, बायरबादा थारी नानी माय से हिटी गी हे।"

३०अने घरे अई के उने देख्यो के नानी बिछावणा पे पडी हुई हे अने बुरी आतमा उका माय से हिटी चुकी हे।

बेर्यो-गुंगो सुणवा बोलवा लाग्यो

३१तो ईसु फेर सूर का परदेस से हिटी के सेदा का इलाका माय होतो होयो गलील का सरवर पे आयो जो दिकापुलिस नगर का इलाका माय हे।

३२अने वी उका कने एक मनख के लाया जो बेर्यो थो अने मुसकिल से बोलतो थो, बेर्या ने ईसु से बिणती करी, के उका पे अपणो हात धरे।

३३उने उके भीड से इकाडी एखला माय लइ-जई के अपणी अंगळी उका कानहुंण माय लाखी, अने उने थुंक्यो अने उना मनख की जीब के अंगळी लगाडी; ३४अने सरग आडी आह भरी के देखता होया उना मनख से क्यो, "इफ्ततह!" याने "खुली जा!"

३५अने उका कान खुली गया, अने उकी जीब की गठाण खुली गी, अने उ सई बोलवा लाग्यो। ३६तो उने उणके हुकम द्यो कइंका के मती बतावजो; पण जितरो उ मना करतो र्यो, इका से बी जादा वी उको परचार करवा लाग्या। ३७वी घणा दंग हुई के केवा लाग्या, "इने जो कंई कर्यो अच्छो कर्यो; उ बेर्याहुंण के बी सुणवा की

अने गुंगाहुंण के बोलवा की ताकत दे हे।"

चार हज्जार के जिमाइणो

(मती १५.३२-३९)

उना दनहुंण माय फेर जदे एक बडीमेक भीड भेळी हुई अने उणका कने खावा सरु कइंनी थो, तो ईसु ने अपणा चेलाहुंण के तेडी के उणकासे क्यो, २"म्हारें इनी भीड पे तरस आय हे, क्योके ई लोग म्हारा साते तीन दन से हे, अने इणका कने खावा सरु कइंबी हयनी। ३इणके भूकाज घरे मोकली दूं तो ई बाट मायज थकी के री जायगा, अने इणका माय से थोडाक तो नरी दूरा से आया हे।"

४उका चेलाहुंण ने जुवाब द्यो, "इणके धपाइवा सरु इना माळ माय कई को इतरा रोटा कां से लई सके?"

५उने उणकासे पुछ्यो, "तमारा कने कितरा रोटा हे?"

उणने क्यो, "सात"

६तो उने भीड के जमीन पे बेठवा की क्यो, अने उने सात रोटाहुंण के लई के परमेसर से आसीस मांगी अने रोटा का बटका करिके लोगहुंण के परोसवा सरु चेलाहुंण के देतो ग्यो अने उणने भीड माय परोस्या। ७उणका कने थोडिक मच्छीहुंण बी थी; उने उणका पे बी आसीस मांगी के उणके बी लोगहुंण माय बांटवा की क्यो। ८अने वी खई के धापी गया, अने उणने बच्या होया कोब्ब्या से भर्या सात टोपला उठाइया। ९अने वां करीब चार हज्जार लोग था। ईसु ने उणके बिदा कर्या, १०अने उ झट

अपणा चेलाहुंण का साते नाव पे चड्डिके दलमनूता परदेस आडी चलयो गयो।

फरीसिहुंण ईसु के फंसाणो चाता था

(मती १२.३८-४२; १६.१-४)

११[†] फेर फरीसी अई के ईसु से बिवाद करवा लाग्या, अने उके अजमाणे सरु उणने उकासे सरग की सेलाणी मांगी। १२[†] उने अपणी आतमा माय गेरी सांस खेंची के क्यो, "इनी पीढी का लोग सेलाणी कायसरु दुंडे? हूं तमार से सांची कूं, इनी पीढी के कइंकी सेलाणी नी दई जायगा।"

१३[†] अने उ उणके छोडी के पाछो नाव पे चड्यो अने दूसरा आडी का कराडा पे चलयो गयो।

यहूदी अगवाहुंण के ईसु की चेतावणी

(मती १६.५-१२)

१४[†] अने वी रोटा लेणो भुली गया था, नाव माय उणका कने सिरप एकज रोटो थो। १५[†] ईसु ने उणके चेतावणी देता होया क्यो, "देखो, फरीसिहुंण का खमीर^b अने हेरोदेस का खमीर से होसियार री जो।"

१६[†] अने वी रोटा नी होवा का बारामें माय-माय बात-चित करवा लाग्या।

१७[†] ईसु ने यो जाणी के उणकासे क्यो, "तम इना सौंच-बिचार माय कायसरु पडी गया के तमारा कने रोटा हयनी? कंई तम अब तक नी देख्यो या समज्यो हयनी,

कंई तमारा हिरदा काठा नी हुई गया? १८[†] आंखहुंण होता होया कंई तम नी देखो? अने कान होता होया कंई तम नी सुणो? अने कंई तम रियाद नी करो? १९[†] जदे म्हने पांच हज्जार सरु पांच रोटा तोइया था, तो तमने कोब्ब्या से भरी बड़ी-बड़ी कितरी टोपलाहुंण उठाडी थी?"

चेलाहुंण ने उकासे क्यो, "बारा"

२०[†] अने जदे म्हने चार हज्जार सरु सात रोटा तोइया था जदे तमने कोब्ब्या से भरी कितरी टोपलाहुंण उठाडी थी?"

उणने उकासे क्यो, "सात।"

२१[†] उने उणकासे क्यो, "कंई तम अबे बी नी समज्या?"

आंदा के आंखहुंण

२२[†] वी बेतसेदा आडी आया अने लोग एक आंदा के उका कने लाया अने उकासे बिणती करिके क्यो आंदा के हात लगाइ। २३[†] ईसु आंदा को हात पकडी के उके गांम से बायरे लई गयो अने उकी आंखहुंण पे थुंक्यो अने उका पे अपणो हात धरी के उकासे पुछ्यो, "कंई थारे थोडोक नगे अई र्यो?"

२४[†] आंदा ने अदरे देखी के क्यो, "हूं मनखहुंण के देखी र्यो हूं, पण वी म्हारे चलता-फरता झाइका सरीका नगे आय हे।"

२५[†] तो उने पाछो उकी आंखहुंण पे हात धर्यो अने उ कोतुक से देखवा लाग्यो, अने उके पाछी देखवा की सकती मिळी,

^b ८.१५ फरीसिहुंण का खमीर; फरीसी अने हेरोदियासहुंण की खराब सीख मनख के खराब करे जसेके खमीर से आखो आंठो खमीर हुई जाय वसेज इणकी सीख से सगळो बिगडी जाय।

[†] ८.११: मती १२.३८; लूका ११.१६ [†] ८.१२: मती १२.३९; लूका ११.२९ [†] ८.१५: लूका १२.१

[†] ८.१८: यरमियाह ५.२१; यहजेकेल १२.२; मरकुस ४.१२

अने उ सगळो कंई साफ-साफ देखवा लाग्यो। ^{२६}ईसु ने उके यो कंई के घरे मोकल्यो, "इना गांम माय पग मती धरजे।"

पतरस ने मान्यो के ईसु परमेसर को बेटो हे

(मती १६.१३-२०; लूका ९.१८-२१)

^{२७}अने ईसु अपणा चेलाहुंण का गेले केसरिया फिलिप्पी का गांम माय ग्यो। रस्ता माय उने अपणा चेलाहुंण से यो पुछ्यो, "लोग म्हारे कंई के हे - हूं कुंण हूं?"

^{२८}उणने क्यो, "योहन बपतिसमा देवा वाळो, अने थोडाक लोग एलियाह^c के हे अने थोडाक दूसरा लोगहुंण का मुजब नबिहुंण माय को एका।"

^{२९}अने ईसु उणकासे सवाल करतो र्यो, "पण तम कंई को हो? हूं कुंण हूं?"

पतरस ने जुवाब दई के क्यो, "तू मसीह^d हे।"

^{३०}तो उने उणके चेताइयो के वी उका बारामें कइंका से नी के।

ईसु ने दुःख भोगवा अने मार्या जावा की बात करी

(मती १६.२१-२८; लूका ८.२२-२७)

^{३१}तो उ उणके परबचन देवा लाग्यो के जरूरी हे के मनख को बेटो नरो दुःख भोगे अने बुडा-हाडाहुंण, मुख-पुरोहितहुंण अने सासतरिहुंण से मान पाइयो जाय

अने मारी लाखयो जाय अने तीन दन पाछे जिन्दो हुई जाय। ^{३२}उ या बात साफ रूप से कंई र्यो थो। इका पे पतरस उके इकाड़ी लइ-जई के झिड़कवा लाग्यो, ^{३३}पण उने फरिके चेलाहुंण आड़ी देख्यो अने पतरस के डांटी के क्यो, "हे सेतान म्हारा अगडे से इकाड़ी हुई जा। तू तो परमेसर की बातहुंण पे नी पण मनखहुंण की बातहुंण पे हिरदो लगाडे हे।"

^{३४}उने भीड़ समेत चेलाहुंण के कने बुलाइया अने लोगहुंण से क्यो, "अगर कंई को म्हारा पाछे आणो चावे तो उ अपने खुद के नकारे, अने अपणो कुरुस उठई के, म्हारा पाछे चल्यो-चले। ^{३५}क्योंके जो अपणो पराण बचाइणो चावे उ उके खोयगा; पण जो कंई को म्हारा अने सुब-समिचार सरु अपणो पराण खोय, उ उके बचाडेगा। ^{३६}क्योंके अगर मनख आखा जग के पई ले अने अपणा पराण के खोय तो उके कंई फायदो? ^{३७}अने मनख अपणा पराण का एवज माय कंई देगा? ^{३८}इकासरु जो कंई को इनी ब्योबिचारी अने पापी पीढी माय म्हार से अने म्हारा बचन से लजाडेगा, हूं मनख को बेटो बी, जदे अपणा पिता की म्हेमा माय पवित्तर सरगदूतहुंण का गेले अउंवां तो हूं उणकासे बी लजउंवां।"

ईसु ने उणकासे यो बी क्यो, "हूं तमार से सांची कूं, यां जो उब्या है उणका माय से नरा लोगहुंण मोत को सुवाद नी चाखेगा जदतक के परमेसर

^c ८.२८ एलियाह; ईसु से करीब ८७४ साल पेलां इसराइल को नबी जेके परमेसर ने रथ समेत सरग पे तोकी ल्यो थो। ^d ८.२९ मसीह; सबद् भण्डार माय देखो।

[†] ८.२८: मरकुस ६.१४-१५; लूका ९.७-८ [†] ८.२९: योहन ६.६८-६९

[†] ८.३४: मती १०.३८; लूका १४.२७ [†] ८.३५: मती १०.३९; लूका १७.३३; योहन १२.२५

का राज के सामरत समेत आयो होयो नी देखी लेगा।"

ईसु का गेले मूसा अने एलियाह का दरसन

(मती १७.१-१३; लूका ९.२८-३६)

२[†] ईसु छे: दन पाछे पतरस अने याकूब अने योहन के अपणा गेले ल्यो अने एखला माय कइंका एक उंचा परबत पे लई गयो; अने उणका सामे उको रूप बदळ्यो। ^३अने उका लतरा इतरा उजळा अने धोळा हुई गया जितरा के धरती को कई को धोबी बी धोळो नी करी सके। ^४अने मूसा नबी^८ का गेले उणके एलियाह नबी नगे आयो, अने दोई ईसु से बात-चित करी र्या था। ^५पतरस ने ईसु से क्यो, "हे रब्बी (गरु) हमारा सरु यां रेणो अच्छो हे; हम यां तीन डेरा बणावां, एक थारा सरु, एक मूसा सरु, अने एक एलियाह सरु।" ^६उ समजी नी र्यो थो के कई कई र्यो हे, क्योके वी घणा डरी गया था।

७[†] तो एक बादळो उठ्यो जेने उणके छई ल्यो, अने उना बादळा माय से या अवाज अई, "यो म्हारो परमिलो बेटो हे, इकी सुणो।" ^८जदे उणने एक दम चारी-मेर नगे फेरी तो अपणा गेले ईसु का अलावा दूसरा कइंका के नी देख्यो।

९जदे वी परबत पे से निच्चे उतरी र्या था तो उने उणके हुकम द्यो के जदत्तक हूं मनख को बेटो मर्या माय से जीवतो

नी हुई जउं तदत्तक जो कई तमने देख्यो उके कइंका से किजो मती।

१०अने वी इनी बात के लई के माय-माय तरक-बितरक करवा लाग्या के मर्या माय से जी उठवा को अरथ कई हुई सके। ^{११} अने वी उकासे यो कई के पुछवा लाग्या, "सासतरी कायसरु के हे, के एलियाह नबी के पेलां आणो जरुरी हे।"

१२उने उणकासे क्यो, "एलियाह नबी के पेलां अई के सगळो कई सुदारणो थो। फेर वी हूं मनख का बेटा सरु यो कायसरु लिख्यो के उ घणो दुःख उठाड़ेगा अने नकार्यो जायगा। ^{१३}पण हूं तमार से सांची कूं, के एलियाह नबी सांची माय अई चुक्यो, अने जसो उका बारामें लिख्यो लोगहुण ने जो चायो उका गेले कर्यो।"

मिरगी का बेमार के नज करनॉ

(मती १७.१४-२१; लूका ९.३७-४३अ)

१४अने जदे वी चेलाहुण कने पाछा आया तो वां देख्यो के उणका चारी-मेर बडीमेक भीड़ लागी हे अने थोडाक सासतरी उणका से बिवाद करी र्या हे। ^{१५}पण जदे भीड़ ने ईसु के देख्यो तो सगळा लोग दंग रई गया अने दोडी के उणने उके नमसकार कर्यो। ^{१६}उने पुछ्यो, "तम उणका गेले कई बिवाद करी र्या हो?"

१७भीड़ माय से एक ने जुवाब द्यो, "हे गरु, हूं थारा कने अपणा बेटा के

^८ ९.४ मूसा नबी; १४०० साल पेलां परमेसर मूसा नबी से इसराइलहुण के मिसर देस की गुलामी से आजाद कर्या अने उका बाद यहोसू नबी ने कनान देस माय इसराइलहुण के बसाइया।

[†] ९.२-७: २ पतरस १.१७-१८ [†] ९.७: मती ३.१७; मरकुस १.११; लूका ३.२२

[†] ९.११: मलाकी ४.५; मती ११.१४

लायो हूं, जेका माय असी आतमा समई हे जो उके गुंगो बणई लाखे हे; १८अने जदे कदी उके पकड़े तो जमीन पे पटकी लाखे अने उ मुन्डा माय झाग भरी लाय अने दांत पिसे अने ऐंठई जाय। म्हने थारा चेलाहुंण से उके हेडवा की क्यो पण वी उके नी हेडी सक्या।"

१९उने जुवाब देता होया उणकासे क्यो, "हे कमबिसासी पीढी का लोगहुंण, हूं कदत्तक तमारा गेले रूंवां? हूं कदत्तक तमारी सउंवां? नाना के म्हारा कने ल्याव।" २०वी नाना के उका कने ल्याया।

अने जदे उने उके देख्यो तो झट उनी आतमा ने उके मरोड्यो अने उ जमीन पे पड़ी के मुन्डा से झाग हेडवा अने अई-वंई रडकवा लाग्यो। २१तो उने उका पिता से पुछ्यो,

"इके कद से असो हुई र्यो हे?" उने जुवाब द्यो, "नानपण सेज। २२उने इके नास करवा सरु कदी लाय माय तो कदी पाणी माय पटक्यो। पण अगर तू कंई करी सके तो हमार पे तरस खई के हमारी मदद कर।"

२३ईसु ने उकासे क्यो, "कंई? अगर तू करी सके! बिसास करवा वाळा सरु सगळो कंई सबगो हे।"

२४नाना का पिता ने झट चिल्लाडी के क्यो, "हूं बिसास करूं, म्हारा कमबिसास को इलाज कर।"

२५जदे ईसु ने देख्यो के भीड़ बड़ती जई री तो उने बुरी आतमा के या कई के फटकारी, "ऐ गुंगी अने बेरी आतमा, हूं थारे हुकम दउं के इका माय से हिट्या अने फेर कदी इका माय मती भराजे।"

२६अने वा चिल्लाडी के अने उके घणो मरोडी के उका माय से हिटी गी; अने नानो असो मर्यो सरीको हुई ग्यो के उणका माय से नरा ने क्यो, "उ तो मरी ग्यो" २७पण ईसु ने उको हात पकड़ी के उके उठाड्यो अने उ उबो उठ्यायो।

२८जदे ईसु घर माय आयो, तो उका चेला एखला माय उकासे पुछवा लाग्या, "हम उके कायसरु हेडी नी सक्या?"

२९उने उणकासे क्यो, "असतरा की ई बुरी आतमाहुंण की जात पराथना का अलावा दूसरा कइंका उपाव से नी हिटी सके।"

अपणी मोत का बारामें ईसु का बिचार

(मती १७.२२-२३; लूका ९.४३ब-४५)

३०फेर वी वां से हिट्या अने गलील इलाका माय से हुई के जावा लाग्या। उ नी चातो थो के कइंका के इको पतो चले। ३१क्योंके उ अपणा चेलाहुंण के सीख दई र्यो थो अने उणके बताडी र्यो थो, "हूं मनख को बेटो, मनखहुंण का हाते पकड़वायो जउंवां, अने वी म्हारे मारी लाखेगा; पण मरी जावा का तीन दन बाद हूं जिन्दो हुई जउंवां।"

३२पण वी या बात के नी समजी सक्या अने उकासे पुछवा से डरता था।

सगळा से मोटो कुंण

(मती १८.१-५; लूका ९.४६-४८)

३३फेर वी कफरनहूम नगर माय पौंच्या, अने जदे उ घर माय थो तो उने उणकासे पुछ्यो, "बाट माय तम कंई विवाद करी र्या था?"

३४+ पण वी छाना र्या, क्योके बाट माय उणने बिवाद कर्यो थो के हमार माय से मोटो कुण हे। ३५+ बेठवा का बाद उने बारा चेलाहुण के तेइया अने उणकासे क्यो, "अगर कई को पेलो बणणो चावे तो सगळा से पछात्यो अने सगळा को सेवक बणे।" ३६+ जदे उने एक बाळक के लई के उणका अदाइ माय उबाइयो, अने उके खोळा माय लई के उणकासे क्यो, ३७+ "जो कई को म्हारा नाम से असा कइंका बाळक के माने उ म्हारे माने, अने जो म्हारे माने उ म्हारे नी पण उके माने जेने म्हारे मौकल्यो हे।"

जो हमारो बिरोद माय हयनी उ हमारो हे

(लूका ९.४५-५०)

३८+ योहन ने उकासे क्यो, "हे गरु, हमने कइंका के थारा नाम से बुरी आतमाहुण हेइते देख्यो अने उके रोकवा की कोसिस करी, क्योके उ हमारो गेले को नी थो।"

३९+ पण ईसु ने उकासे क्यो, "उके मती रोको, क्योके असो कई को नी जो म्हारा नाम से अचरज को काम करे अने उका झट पाछे म्हारे बुरो कइदे। ४०+ क्योके जो हमारो बिरोद माय हयनी उ हमारो गेले हे। ४१+ जो कई को तमार मसीह का होवा की वजासे एक गिलास पाणी पिवाड़े, तो हूं तमार से सांची कूं के उ अपणो फळ कदी नी खोयगा।

पाप माय पड़वा को लोभ

(मती १८.६-९; लूका १७.१-२)

४२+ अने जो कई को बिसास करवा वाळा इना नानाहुण माय से एक के बी ठोकर खवाड़े तो उका सरु अच्छो होतो के उका गळा माय बजनदार घट्टी को पड़ लटकाडी के उके समन्दर माय लाख्यो जातो। ४३+ अने अगर थारो हात थार से पाप करावे, तो उके काटिके फेंकी लाख; थारा सरु यो भलो के तू बिना हात के जीवन माय जावे इका बदळे के दो हात रेता नरक माय याने उनी नी बुजवा वाळी लाय माय लाख्यो जाय। ४४+ (४४ याने ४६ पद ४८ काज सरीको हे अने खास पाण्डुलिपि माय नी मिळे) ४५+ अगर थारो पग थारे ठोकर खवाड़े तो उके काटिके फेंकी लाख; दो पग रेता होया नरक माय जाणे से भलो हे के लंगडो हुई के सरग माय जावे। ४६+ (४४ का सरीकोज हे) ४७+ अगर थारी आंख थार से पाप करावे, तो उके हेडी फेंक। भलो यो के तू काणो हुई के परमेसर का राज माय जावे, बजाय इका के तू दो आंख रेता होय नरक माय लाख्यो जाय, ४८+ जां उणको किडो नी मरे अने नी लायज बुजे हे।

४९+ क्योके हरेक जणो लाय से लूणो कर्यो जायगा।

५०+ लूण अच्छो हे, पण अगर लूण को सुवाद खतम हुई जाय तो उके पाछो कायसे लूणो करोगा?

† ९.३४: लूका २२.२४ † ९.३५: मती २०.२६-२७, २३.११; मरकुस १०.४३-४४; लूका २२.२६

† ९.३७: मती १०.४०; लूका १०.१६; योहन १३.२० † ९.४०: मती १२.३०; लूका ११.२३

† ९.४१: मती १०.४२ † ९.४३: मती ५.३० † ९.४७: मती ५.२९ † ९.४८: यसायाह ६६.२४

† ९.५०: मती ५.१३; लूका १४.३४-३५

"अपणा माय लूण राखो अने माय-माय मिळी-जुळी के रो।"

फारकती का बारामें ईसु की सीख

(मती १९.१-१२; लूका १६.१८)

ईसु वां से उठी के यरदन नदी १० का पार यहूदिया का इलाका माय आयो; अने भीड़ पाछी उका कने भेळी हुई गी, अने अपणी रीति मुजब उ उणके पाछो परबचन देवा लाग्यो।

२तो थोडाक फरीसी उके अजमाणे सरु उका कने आया अने उकासे पुछवा लाग्या के कंई-कइंका मनख सरु अपणी घराळी के फारकती देणो नेम से सई हे।

३उने उणकासे क्यो, "मूसा नबी ने तमारे कंई हुकम द्यो?"

४+ उणने क्यो, "मूसा ने मनख के हुकम द्यो के उ फारकती लिखी के बइरा के छोडी लाखे।"

५पण ईसु ने उणकासे क्यो, "मूसा ने यो हुकम तमारा हिरदा का काठापण की वजासे लिख्यो हे। ६+ पण जग का सरु माय परमेसर ने उणके एक नर अने एक नारी बणाया था। ७+ इनी वजासे मनख अपणा मां-बापहुंण के छोडी के अने अपणी घराळी का गेले मिळ्यो रेगा। ८+ अबे वी दोई एक काया रेगा; मतलब यो के वी दो हयनी पण एक काया हे। ९इकासरु जिणके परमेसर ने जोड्या उणके कंई को मनख इकाडी नी करे।"

१०जदे चेलाहुंण घर माय आया तो इका बारामें ईसु से पाछा पुछवा लाग्या। ११+ उने उणकासे क्यो, "जो कंई को अपणी घराळी के फारकती दई के दूसरी बइरा से ब्याव करे, उ उकी घराळी का बिरोद माय ब्योबिचार करे। १२+ अने बइरा बी अपणा घराळा के फारकती दई के दूसरा आदमी से ब्याव करे तो वा ब्योबिचार करे हे।"

बाळकहुंण के ईसु की आसीस

(मती १९.१३-१५; लूका १८.१५-१७)

१३फेर लोग बाळकहुंण के उका कने लावा लाग्या के उ उणका माथा पे हात धरे पण चेलाहुंण ने उणके डांट्या। १४ईसु ने जदे यो देख्यो तो गुम्सो हुई के उणकासे बोल्यो, "बाळकहुंण के म्हारा कने आवा दो, उणके मना मती करो, क्योके परमेसर को राज असाज को हे। १५+ हूं तमार से सांची कूं, जो कंई को परमेसर का राज के बाळक सरीको नी माने उ उका माय कदी बी जई नी सकेगा।" १६तो उने उणके खोळा माय लई के अने उणका पे हात धरी के उणके आसीस देवा लाग्यो।

धणी मनख को सवाल

(मती १९.१६-३०; लूका १८.१८-३०)

१७जदे उ जातरा पे जावा सरु थो तो एक मनख दोडतो होयो उका कने आयो

† १०.७ थोडाक हात का लेखहुंण माय असो हे, अने उकी घराळी का गेले जुड्यो रेगा।

† १०.४: नेम-बिधान २४.१-४; मती ५.३१ † १०.६: उत्पत्ती १.२७, ५.२

† १०.७-८: उत्पत्ती २.२४ † १०.११-१२: मती ५.३२; † कुरिन्थिहुंण ७.१०-११

† १०.१५: मती १८.३

अने गोडा टेकी के उकासे पुछवा लाग्यो, "हे भला गरु, सदा का जीवन को हाकिम होवा सरु हूं कई करूं?"


१८ईसु ने उकासे क्यो, "तू म्हारे अच्छो कायबले के? परमेसर का अलावा कई को भलो हयनी। १९+ तू हुकमहुंण तो जाणे हे: 'घात नी करनों, ब्योबिचार नी करनों, चोरी नी करनों, झुंटी गवई नी देणो, छळ नी करनों, अपना पिता अने अपनी मेतारी को मान राखणो,

२०उने उकासे क्यो, "हे गरु, हूं नानपणा सेज इनी सगळी बातहुंण को पाळण करतो अई र्यो हूं।"

२१उके देखी के ईसु के उका पे परेम आयो अने उने क्यो, "थारा माय अबे बी एक बात की कमकोती हे। जा, जो कई थारो हे उके बेची के गरीब-गुरबा माय बांटी लाख अने थारे सरग माय धन मिळेगा, अने अई के म्हारा पाछे चल्यो-चल। २२यो बचन सुणी के उको मुन्डो उतरी ग्यो अने उ दुःखी हुई के वां से चल्यो ग्यो, क्योके उ घणो मालदार थो।

२३ईसु ने चारी-मेर नगे फेरी के अपना चेलाहुंण से क्यो, "मालदारहुंण सरु परमेसर का राज माय जाणो कितरो अबगो हे!"

२४चेलाहुंण उका सबदहुंण से दंग रई ग्या।' पण ईसु ने उणकासे पाछो क्यो, "हे बाळकहुंण परमेसर का राज माय जाणो कितरो अबगो हे! २५परमेसर का राज माय कईका मालदार के जाणे की



ऊंट (MRK १०.२५)

बजाय ऊंट के सुई का नाका माय से हितणो जादा सबगो हे।"

२६चेलाहुंण हजु बी घणो अचम्बो करिके पुछवा लाग्या, तो किको उध्दार हुई सकेगा?"

२७ईसु ने उणका आडी देखी के क्यो, "मनखहुंण सरु तो यो अबगो हे पण परमेसर सरु हयनी, क्योके परमेसर सरु सगळो कई सबगो हे।"

२८पतरस उकासे केवा लाग्यो, "देख, हम तो सगळो कई छोडी के थारा पाछे हुई ग्या हे।"

२९ईसु ने क्यो, "हूं तमार से सांची-सांची कूं, असो कई को हयनी जेने म्हारा अने सुब-समिचार की वजासे घर अने, भई-बेनहुंण अने मेतारी अने पिता अने बाळकहुंण अने खेतहुंण के छोडी लाख्या हो, ३०अने उ इना बखत घरहुंण, अने भई-बेनहुंण, अने मेतारी अने बाळकहुंण अने खेतहुंण को सो गुणो जादा नी पाय, पण सताव का गेले, अने आवा वाळा जुग माय सदा को जीवन बी मिळेगा। ३१+ पण नरा

जो पेलों हे, पाछल्या रेगा अने जो पाछल्या हे वी पेलों रेगा।"

ईसु अपनी मोत की भविसबाणी करे

(मती २०.१७-१९; लूका १८.३१-३४)

३२ अने वी यरुसलेम जाता होया रस्ता माय था। अने ईसु उणका अगडे-अगडे चली र्यो थो। चेलाहुंण दंग था, अने जो पाछे अई र्या था वी डर्या होया था। उ पाछो बारा चेलाहुंण के इकाड़ी लई ग्यो अने जो कंई उणका गेले घटवा वाळो थो, उणके बताइवा लाग्यो: ३३ "देखो, हम यरुसलेम नगर जई र्या हे, अने हूं मनख को बेटो मुख-पुरोहितहुंण अने सासतरिहुंण का हाते पकड़वायो जउंवां; अने वी म्हारे मोत की सजा का लायक ठेरई के गेर यहूदिहुंण का हाते दई देगा। ३४ अने वी म्हारो मजाक उडायगा, म्हार पे थुंकेगा, म्हारे कोडा मारेगा अने मारी लाखेगा, अने हूं तीन दन पाछे जीवतो हुई जउंवां।

याकूब अने योहन की ईसु से बिणती

(मती २०.२०-२८)

३५ तो जब्दी का दोई बेटा, याकूब अने योहन उका कने अई के केवा लाग्या, "हे गरु, हम चावां के जो कंई हम थार से मांगा वइज हमारा सरु करजे।"

३६ अने उने क्यो, "तम कंई चाव हो के हूं तमारा सरु करूं?"

३७ उणने उकासे क्यो, "थारी म्हेमा माय हमारा माय से एक थारा सुदा हाताड़ी अने दूसरो थारा डाबा हाताड़ी^६ बेठे।"

३८[†] पण ईसु ने उणकासे क्यो, "तम नी जाणो के कंई मांगी र्या हो। जो कटोरो^६ हूं पीवा पे हूं कंई तम पी सको हो? या जो बपतिसमो हूं लेवा पे हूं, कंई तम ली सको हो?"

३९ अने उणने उकासे क्यो, "हम करी सकां।"

अने ईसु ने उणकासे क्यो, "उ कटोरो जो हूं पीवा पे हूं तम प्योगा, अने जो बपतिसमो हूं लेवा पे हूं उके बी तम लोगा। ४० पण अपना सुदा हाताड़ी अने डाबा हाताड़ी बेठाणो म्हारो काम हयनी, यो उणकाज सरु हे जिणका सरु तय्यार कर्यो हे।"

४१ या सुणी के दसी चेलाहुंण याकूब अने योहन से रिसई ग्या। ४२[†] तो ईसु ने उणके कने तेडी के उणकासे क्यो, "तम जाणो हो के जो गेर यहूदिहुंण का हाकिम समज्या जाय वी उणका पे राज कर्या करे हे; अने उणका माय जो मोटो रे उणका पे हक जताडे हे। ४३[†] पण तमारा माय असो नी हे, बरण जो कंई को तमारा माय मोटो होणो चावे, उ तमारो सेवक बणे; ४४ अने जो तमारा माय परधान होणो चावे, उ सगळा को सेवक बणे। ४५ क्योके हूं मनख को बेटो बी खुद की सेवा

^६ १०.३७ सुदा हाताड़ी ... डाबा हाताड़ी; हक अने मान की जगा। दुःख को प्यालो।

^६ १०.३८ कटोरो; दुःख सेणो,

[†] १०.३८: लूका १२.५० [†] १०.४२-४३: लूका २२.२५-२६

[†] १०.४३-४४: मती २३.११; मरकुस ९.३५; लूका २२.२६

कराणे नी पण सेवा करवा अने नरा का बदळा का मोल माय म्हारो पराण देवा आयो।"

आंदा की आंखुंण

(मती २०.२९-३४; लूका १८.३५-४३)

४६वी यरीहो नगर पोंच्या। अने जदे उ अपणा चेलाहुंण अने घणी बडीमेक भीड का गेले यरीहो नगर से बायरे जई र्यो थो तो बरतिमाई नामको एक आंदो मंगतो, जो तिमाई को बेटो थो, बाट-मेरे बेठ्यो होयो थो। ४७जदे उने सुण्यो के यो नासरत रेवासी ईसु जई र्यो हे तो हेला पाडी के केवा लाग्यो, "हे ईसु, दाऊद की सन्तान म्हार पे दया करजे!"

४८नरा ने डांटी के क्यो, "के उ छानो रे, पण उ हजु जोर से चिल्लाइवा लाग्यो, "दाऊद की सन्तान, म्हार पे दया करजे!"

४९तो ईसु ने रुकी के क्यो, "उके तेडी लो।"

अने लोगहुंण ने उना आंदा के यो केता होया तेइयो, "हिम्मत राख, उठ्या! उ थारे तेडी र्यो हे।"

५०अने उ अपणो चोळो इकाडी फेंकी के उछळी पड़्यो अने ईसु कने आयो।

५१ईसु ने जुवाब देता होया क्यो, "तू कई चावे के हू थारा सरु करूं?"

अने उना आंदा ने उकासे क्यो, "म्हारा गरु, हूं चउं के देखवा लागुं।"

५२ईसु ने उकासे क्यो, "चल्यो जा, थारा बिसास ने थारे नज कर्यो।"


उ झट देखवा लाग्यो अने बाट माय ईसु का पछडे चलवा लाग्यो

ईसु यरुसलेम माय बिजयी राजा का रुप माय

(मती २१.१-११; लूका १९.२८-

४०; योहन १२.१२-१९)

जदे वी यरुसलेम नगर कने, जेतून ११ परबत का कराडे बेतफगे अने बेतनिय्याह गांम माय पोंच्या तो ईसु ने अपणा दो चेलाहुंण के मोकल्या, २अने उणकासे क्यो, "अपणा सामे का गांम माय जाव अने जाताज तमारे एक गदडी



बन्द्यो गदडी (MRK ११.२)

को बच्यो बन्द्यो होयो मिळेगा जेका पे अभी तक कई को बेठ्यो हयनी। उके छोडी ल्याव। ३अगर कई को तमार से के, असो कायसरु करी र्या हो?" तो तम किजो परभु के इकी जरुवत हे, 'अने उ झटज उके यां मोकलेगा।"

४वी गया अने उणके बायरे, सेरी माय कमांड कने एक गदडी को बच्यो बन्द्यो

होयो मिळ्यो, वी उके छोडवा लाग्या।
 ५वां उब्या थोडाक लोगहुंण ने उणकासे
 क्यो, "यो कंई करी र्या हो, गदडी का
 बच्चा के कायसरु छोडी र्या हो?"

६अने ईसु ने जसो क्यो थो चेलाहुंण
 ने वसोज उणकासे कंई द्यो; तो उणने
 उके लई जावा द्यो। ७उणने गदडी का
 बच्चा के लई के उका पे अपणा लतरा
 लाख्या; अने ईसु उका पे बेठी ग्यो।
 ८अने नरा ने अपणा लतरा बाट माय
 बिछाड्या, अने दूसरा लोगहुंण ने खेतहुंण
 माय से डाळहुंण काटिके बिछाडी लाखी।
 ९ वी जो उका अगडे-अगडे जाता अने
 पछडे-पछडे चल्या अई र्या था हेला पाडी
 के कंई र्या था, "होसन्ना! धन हे उ
 जो परभु का नाम से आवे! १० हमारा
 पिता दाऊद को आवा वाळो राज धन्य
 हे! सगळा से उंची जगा माय होसन्ना!"

११उ यरुसलेम नगर माय अई के
 मन्दर माय आयो; अने चारी-मेर देखी के
 बारा चेलाहुंण का गेले बेतनिय्याह गांम
 चल्यो ग्यो क्योके सांज हुई चुकी थी।

अंजीर का झाड़ के सराप

(मती २१.१८-१९)

१२अने दूसरा दन जदे वी बेतनिय्याह
 से हिट्या तो उके भूक लागी। १३अने पत्ता
 से भर्या एक अंजीर का झाड़ के दूरा
 से देखी के, उका कने ग्यो के कदी कंई
 मिळी जाय पण वां पौंची के, उके पत्ता
 का अलावा हजु कइंनी लाद्यों, क्योके
 फळ लागवा को मोसम नी थो। १४तो

उने झाड़ से क्यो, "अबसे कंई को थारो
 फळ कदी नी खाणे पाय।"

अने उका चेलाहुंण सुणी र्या था।

ईसु मन्दर माय

(मती २१.१२-१७; लूका १९.४५-

४८; योहान २.१३-२२)

१५फेर वी यरुसलेम नगर आया
 अने मन्दर माय जई के वां लेण-देण
 करवा वाळाहुंण के हेडवा लाग्यो, अने
 अडतियाहुंण की तिपई अने कबुतर
 बेचवा वाळाहुंण की कुडछिहुंण के पलटी
 लाखी; १६अने उने कइंका केज मन्दर
 माय हुई के समान लई जावा को हुकम
 नी द्यो। १७ अने उ उणके परबचन देवा
 लाग्यो, "कंई यो नी लिख्यो हे, 'म्हारो
 घर सगळी जातहुंण सरु पराथना को घर
 केवायगा'? पण तमने उके डाकूहुंण की
 गुफा बणई राखी हे।"

१८अने मुख-पुरोहितहुंण अने
 सासतरिहुंण ने जदे यो सुण्यो तो उके
 नास करवा सरु मोको ढुंडवा लाग्या,
 क्योके वी उकासे डरता था, इकासरु के
 सगळा मनखहुंण उकी सीख से दंग था।

१९अने सांज होताज, वी नगर से बायरे
 चल्या जाया करता था।

बिसास की ताकत

(मती २१.२०-२२)

२०फेर दन उगे जदे वी वइंसे जई र्या
 था, तो उणने उना अंजीर का झाड़ के
 जड समेत सुक्यो होयो देख्यो। २१पतरस

† ११.९ होसन्ना; हमारे बचाड़ !

† ११.९: भजन संहिता ११८.२५-२६ † ११.१०: भजन संहिता ११८.२५,२६

† ११.१७: यसायाह ५६.७; यरमियाह ७.११

ने रियाद करिके क्यो, "रब्बी^k देख, तो! यो अंजीर को झाड़ जेके तने सराप द्यो थो सुकी ग्यो।"

२२ईसु ने उकासे क्यो, "परमेसर पे बिसास राख। २३[†] हूं थार से सांची कूं, जो कई को इना परबत से केगा, 'उखड़ी जा अने समन्दर माय जई पड़, 'अने अपणा हिरदा माय सक नी करे, पण जो कई उने क्यो, बिसास करे के हुई जायगा तो उका सरु हुई जायगा। २४[†] इकासरु हूं तमार से कूं, के जो कई तम पराथना माय मांगो हो बिसास करो के तम उके पई चुक्या हो, अने उ तमारे मिळी जायगा। २५[†] अने जदे कदी तम उबा हुई के पराथना करो तो अगर तमारा हिरदा माय कइंका सरु थोडोक बिरोंद हे तो मांफ करो, जेकासे के तमारो पिता जो सरग माय हे तमारा बी कसूर मांफ करे। २६(अगर तम मांफ नी करोगा तो तमारो पिता बी जो सरग माय हे, तमारो कसूर मांफ नी करेगा।)"[†]

ईसु का हक पे सवाल

(मती २१.२३-२७; लूका २०.१-८)

२७वीं पाछा यरुसलेम नगर आया। अने जदे ईसु मन्दर माय फिरी र्यो थो, तो मुख-पुरोहित, सासतरी अने बुडा-हाडा उका कने आया, २८वीं उकासे पुछवा लाग्या, "तू यो काम केका हक से करी र्यो, या इना कामहुंण को करवा को हक थारे केने द्यो हे?"

२९अने ईसु ने उणकासे क्यो, "हूं तमार से एक सवाल पुछूं। तम म्हारे जुवाब दोगा, फेर हूं बी तमारे बतउंवां के यो काम केका हक से करूं। ३०योहन को बपतिसमो करवा को हक सरग आडी से थो के मनख आडी से? म्हारे जुवाब दो।"

३१वीं या कई के माय-माय बिवाद करवा लाग्या, "अगर हम कां, 'सरग से, 'तो उ केगा, तो तमने उको बिसास कायसरु नी कर्यो?' ३२फेर हम या कां, 'मनखहुंण आडी से ... ' " (वी लोगहुंण से डरता था क्योके सगळा यो मानता था के योहन सांची माय एक नबी थो।) ३३ईसु के जुवाब देता होया उणने क्यो, "हम नी जाणा।"

तो ईसु ने उणकासे क्यो, "हूं बी तमारे नी बतउंवां के यो काम केका हक से करूं।"

परमेसर ने अपणा बेटा के मोकल्यो

(मती २१.३३-४६; लूका २०.९-१९)

† फेर ईसु उणके मिसालहुंण माय १२ केवा लाग्यो: एक मनख ने अंगूर को बगीचो लगाइयो, अने बाडो बान्दी के उके घेरी ल्यो, अने अंगूर की घाणी का निचचे एक रसकुंड खोदयो, अने एक डागळो बणायो, अने किरसाणहुंण के उदडा पे दई के जातरा पे चल्यो ग्यो। २फसल का मोसम माय उने एक दास के किरसाणहुंण कने मोकल्यो के उना किरसाणहुंण से अंगूर का बगीचा की

^k ११.२१ रब्बी; गरु। [†] ११.२५ थोडाक हात का लिख्या होया लेख माय २६ आयत जोडी हे (देखो मती ६.१५)।

[†] ११.२३: मती १७.२०; † कुरिन्थिहुंण १३.२ [†] ११.२५-२६: मती ६.१४-१५

[†] १२.१: यसायाह ५.१-२

थोडिक फसल लइ-याय। ^३पण उणने उके पकड़ी के कुट्यो अने उके रिता हाते मोकली द्यो। ^४उने उणका कने फेर-पाछो एक दास मोकल्यो, अने उणने उको माथो फोडी लाख्यो अने उको मान पाइयो। ^५फेर उने एक हजु के मोकल्यो, उणने उके मारी लाख्यो: अने असतरा दूसरा नरा के बी, कइंका के कुट्या अने कइंका के मारी लाख्या। ^६अबे मोकलवा सरु उका कने एक हजु रई ग्यो याने उको परमिलो बेटो, या सौंची के उने आखर माय उके बी मोकली द्यो के 'वी म्हारा बेटा को मान राखेगा।' ^७पण उना किरसाणहुंण ने माय-माय क्यो, योज तो वारिस हे; आव, हम इके मारी लाखां, तो सगळी जायजाद हमारी हुई जायगा।' ^८अने उणने उके पकड़ी के मारी लाख्यो अने अंगूर का बगीचा का बायरे फेंकी लाख्यो।

^९इकासरु अंगूर का बगीचा को मालेख कइं करेगा? उ अई के किरसाणहुंण के नास करी लाखेगा अने अंगूर को बगीचो दूसरा के दई देगा। ^{१०} कइं तमने पवितर सासतर को यो बचन नी बांच्यो:

जेना एरण के राज मिसतरिहुंण ने नकारी द्यो थो,
उज कोणा को खास एरण
बण्यो।

^{११} † यो परभु आड़ी से होयो
अने हमारी नगेहुंण माय अनोखो
हे!"

^{१२}यहूदिहुंण का अगवाहुंण ईसु के पकड़वा चाता था, फेर बी लोगहुंण से डरता था, क्योके वी समजी गया था के उने या मिसाल हमारा बिरोद माय कई हे। इकासरु वी उके छोडी के चल्या गया।

ईसु के छळावा की कोसिस

(मती २२.१५-२२; लूका २०.२०-२६)

^{१३}उणने थोडाक फरीसिहुंण अने हेरोदियाहुंण के उका कने मोकल्या के उकीज बातहुंण माय उके उळजावे। ^{१४}अने उणने अई के उकासे क्यो, "हे गरु, हम जाणा हे के तू सांचो हे अने तू कइंका का केणा माय नी आय। तू तो कइंका की तरफदारी बी नी करे, पण परमेसर की बाट सचचई से सीखाडे। केसर राजा[‡] के कर चुकाणो ठीक हे के नी?"

^{१५}हम कर चुकावा के नी चुकावा?" पण उने उणका ढोंग के भांपी के उणका से क्यो, "तम म्हारे कायसरु परखो हो? एक कलदार सिक्को, म्हारा कने लाव के हूं उके देखुं।"

^{१६}वी कलदार सिक्को लाया, अने उने उणकासे क्यो, "इका पे केको मुन्डो अने केको नाम लिख्यो हे?"

उणने क्यो, "केसर राजा को।"

^{१७}अने ईसु ने उणकासे क्यो, "जो केसर राजा को हे उ केसर के दो, अने जो परमेसर को हे उ परमेसर के दो।" अने वी दंग रई गया।

[‡] १२.१४ केसर राजा; रोम का म्हाराजा की पदवी या ओडक।

† १२.१०-११: भजन संहिता ११८.२२-२३

‡ १२.११: भजन संहिता ११८.२२-२३

सदुकिहुंण की चाल

(मती २२.२३-३३; लूका २०.२७-४०)

१८† फेर थोड़ाक सदुकी - जो यो के हे के पाछो जी उठणो हेज नी - उका कने अई के पुछवा लाग्या, १९† हे गरु, हमारा सरु मूसा ने एक नेम-बिधान लिख्यो के अगर कइंका को भई बे-ओलाद मरी जाय, अने अपणा पाछे घराळी के मेली जाय तो उको भई उकी बइरा से ब्याव करी ले अने अपणा भई सरु ओलाद पेदा करे। २०† सात भई था। पेलो भई ब्याव करिके बे-ओलाद मरी गयो। २१† तो दूसरा भई ने उनी बइरा से ब्याव कर्यो अने बे-ओलाद मरी गयो, अने तीसरा ने बी असोज कर्यो। २२† अने साती से कइंकी ओलाद नी हुई। आखर माय वा बइरा बी मरी गी। २३† पाछा जदे वी जीवता हुई जायगा तो वा केकी घराळी रेगा? क्योके वा साती भईहुंण की बइरा बणी थी।"

२४† ईसु ने उणकासे क्यो, "कई तम इनी वजा से भूल माय नी पइया हो के तम नी तो पवित्तर - सासत्तर के समज्या हो अने नीज परमेसर की सामरत के? २५† क्योके जदे लोग मर्या माय से जी उठे, तो वी नितो ब्याव करवा अने नीज ब्याव माय द्या जावे बरण वी सरग माय सरगदूतहुंण सरीका रे हे। २६† अने इनी बात का बारामे के मर्या पाछा जी उठ्याय हे, कई तमने मूसा की पोथी माय बळती हुई झांडी की कथा नी बांची? के परमेसर ने कसतरा

मूसा से क्यो, 'हूं इबराइम को परमेसर, अने इसाक को परमेसर, अने याकूब को परमेसर हूं? २७† उ मर्याहुंण को नी पण जीवताहुंण को परमेसर हे। तम घणी भूल माय पइया हो।"

सगळा से बड़ो हुकम

(मती २२.३४-४०; लूका १०.२५-२८)

२८† सासतरिहुंण माय से एक ने अई के उणके बाद-बिवाद करता सुण्या, अने या जाणी के के ईसु ने कितरा अच्छा तरीका से उणके जुवाब द्यो, उकासे पुछ्यो, सगळा से खास हुकम कां को हे?"

२९† ईसु ने जुवाब द्यो, "खास हुकम यो हे: 'हे इसराइल सुण, परभु हमारो परमेसर एकज परभु हे, ३०† अने तू परभु अपणा परमेसर से अपणा आखा हिरदा, अने अपणा आखा पराण अने अपणी आखी बुद्धि अने अपणी आखी सकती से परेम करजे।' ३१† अने दूसरी या, 'तू अपणा पड़ोसी से अपणा सरीको परेम करजे।' इणकासे बडी के हजु कई को हुकम हयनी।"

३२† सासतरी ने उकासे क्यो, "हे गरु, बिलकुल ठीक, तने सांचीज क्यो हे के उ एकज हे; अने उके छोडी के कई को दूसरो हुकम हयनी; ३३† अने उकासे आखा हिरदा, आखा पराण, आखी बुद्धि, अने आखी सकती से परेम करनां, अने अपणा पड़ोसी से अपणा सरीको परेम करनां, सगळी होमबली की सामगरिहुंण से अने बलिदानहुंण से बडी के हे।"

† १२.१८: परेरितहुंण २३.८ † १२.१९: नेम-बिधान २५.५ † १२.२६: निरगमन ३.६

† १२.२८-३४: लूका १०.२५-२८ † १२.२९: नेम-बिधान ६.४-५ † १२.३१: लेट्यव्यवस्था १९.१८

† १२.३२: नेम-बिधान ४.३५ † १२.३३: होसे ६.६

३४ जदे ईसु ने देख्यो के उने समजदारी से जुवाब द्यो, तो उकासे क्यो, 'तू परमेसर का राज से दूरो हयनी,

"अने इका बाद कइंका के उकासे पुछवा की हिम्मत नी री।

मसीह का बारामें सवाल

(मती २२.४१-४६; लूका २०.४१-४४)

३५ ईसु मन्दर माय परबचन दई र्यो थो तो उने क्यो, "सासतरी कसा के हे, के मसीह दाऊद को बेटो हे? ३६ क्योके दाऊद ने खुद पवित्तर आतमा माय हुई के क्यो हे,

'परभु ने म्हारा परभु से क्यो,
"म्हारा सुदा हाताडी बेट
जदत्तक के हूं थारा बेरिहुंण के
थारा पगहुंण की चोकी नी
बणई लाखुं "।'

३७ दाऊद खुद ईसु के 'परभु' के हे; तो उ दाऊद को बेटो कसे होयो?" बडीमेक भीड़ बड़ा आनन्द से उकी सुणी री थी।

नेम-बिधान का जाणकारहुंण से सावधान

(मती २३.१-३६; लूका २०.४५-४७)

३८ अने उ अपणा परबचन माय कई र्यो थो, "सासतरिहुंण से होसियार रो, जो लम्बा चोळा पेरिके अई-वंई घुमवा अने हाट-बजारहुंण माय मान ३९ अने पराथनाघरहुंण माय खास आसण अने भोजहुंण माय मान की जगा पाणों अचछी

लागे। ४० इज वी हे जो रांडिहुंण को घर गटकी जाय,^{४०} अने धरम को दिखावो करिके लम्बी-लम्बी पराथनाहुंण करे। ई घणी भारी सजा पायगा।"

सांचो दान

(लूका २१.१-४)

४१ उ मन्दर का खजाना का सामे बेठी ग्यो अने देखवा लाग्यो के लोग कसतरे मन्दर का खजाना माय पइसा लाखी र्या था; अने नरा धणिहुंण मोटी-मोटी रकम लाखी र्या था। ४२ इतरा माय एक गरीब रांडी बइरा ने अई के तांबा की दो नानी-नानी दमडी लाखी जिणको मोल करीब एक पइसा का बरोबर रे हे। ४३ तो ईसु ने अपणा चेलाहुंण के कने बुलाडी के उणकासे क्यो, "हूं तमार से सांची-सांची कूं, के खजाना माय लाखवा वाळाहुंण



दो छदाम (MRK १२.४४)

^{४०} १२.४० जो रांडिहुंण को घर गटकी जाय; नेम-बिधान मुजब धन-सम्पती से इकाडी करिके उणकी दसा बिगाडी दे।

^{४१} १२.३६: भजन संहिता ११०.१

माय से इनी गरीब रांडी बड़रा ने सगळा से बडी के लाख्यो हे; ४४क्योंके दूसरा सगळा ने अपणा नरा माय से लाख्यो हे, पण इने अपणी गरीबी माय से जो कई उको थो याने अपणी आखी जीविका लाखी दी हे।"

ईसु ने बिनास होवा की भविसबाणी करी

(मती २४.१-२; लूका २१.५-६)

१३ जदे ईसु मन्दर से बायरे हिटी र्यो थो तो उका चेलाहुंण माय से एक ने उकासे क्यो, "हे गरु, देख, कसा मोटा एरण अने कसो अलिसान भवन!"

२अने ईसु ने उणकासे क्यो, "तम इना अलिसान भवनहुंण के देखी र्या हो? एक एरण पे एरण बी नी रेगा सगळो ढळ्ढायो जायगा।"

अबदाहुंण अने सताव

(मती २४.३-१४; लूका २१.७-१९)

३जदे उ मन्दर का सामे जेतून परबत पे बेठ्यो थो तो पतरस, याकूब, योहन, अने अन्द्रियास ने एखला माय उकासे पुछ्यो, ४"हमारे बताइ के ई बातहुंण कदे होयगा अने सगळी बातहुंण जदे पूरण होवा पे रे तो इणकी सेलाणी कई रेगा?"

५अने ईसु उणकासे केवा लाग्यो, "होसियार रो के कई को तमारे धोको नी दई दे। ६नरा म्हारा नाम से या केता होया आयगा, हूं उज हूं! अने वी नरा के धोको देगा। ७जदे तम लडइहुंण की चरचा अने लडइहुंण की अफवा सुणो तो

घबरावजो मती; इनी बातहुंण को होणो जरुरी हे। फेर बी उना बखत अंत नी होयगा। ८क्योंके एक जात का बिरोद माय दूसरी जात अने एक राज का बिरोद माय दूसरो राज उठ्यायगा। नरी जगाहुंण पे जमीन धुजेगा अने बिखो पड़ेगा। ई सगळी बातहुंण तो दुःख-दरद की सुरुआतज रेगा।

९+ पण तम होसियार रो। क्योंके लोग तो तमारे कचेरीहुंण का हवाले करी देगा अने पराथनाघरहुंण माय कोडा मारेगा, अने तम म्हारी वजासे सासकहुंण अने राजाहुंण का सामे उव्या रोगा ताके उणका सामे गवई रे। १०अने जरुरी हे के पेलां सुब-समिचार सगळी जातहुंण माय परचार कर्यो जाय। ११वी जदे तमारे बन्दी बणई के कचेरी माय दई दे तो पेलां से सांसो मती करजो के हम कई कांगा, पण उनीज घडी तमारे जो कई क्यो जाये उज करजो; क्योंके बोलवा वाळा तम नी रो, पण पवितर आतमा रे हे १२भई, भई के अने बाप, बेटा के मोत सरु दई देगा; अने छोरा-छोरी अपणा मां-बाप का बिरोद माय उठ्यायगा अने उणके मरवई लाखेगा। १३+ अने म्हारा नाम की वजासे सगळा लोग तमार से घिरणा करेगा, पण जो आखर तक जिरना मारेगा उकोज उध्दार होयगा।

उजाइवा वाळी

(मती २४.१५-२८; लूका २१.२०-२४)

१४पण जदे तम उनी उजाइवा वाळी घिरणित चीज+ के वां उबी देखो जां

† १३.९-११: मती १०.१७-२०; लूका १२.११-१२

† १३.१३: मती १०.२२

† १३.१४: दानियल ९.२७, ११.३१, १२.११

उके नी होणो चाय - बांचवा वाळो समजी जाय - तो जो यहूदिया परदेस माय रे वी परबतहुंण अदरे भागी जाय।^{१५} अने उ जो घर का छज्जा अदरे रे, निचचे नी उतरे अने नी कंई लेवा सरु घर का भितरे जाय, ^{१६}अने उ जो खेत माय रे, अपणो चोळो लेवा सरु पाछो नी पलटे। ^{१७}पण उनी नारीहुंण सरु धिक्कार जो उना दनहुंण माय गरभ से रेगा अने जो बाळकहुंण के धवाडती रेगा! क्योके वी दन घणा भयंकर रेगा। ^{१८}पराथना करो के यो स्याळा माय नी होय। ^{१९} क्योके वी दन असा कळेस का रेगा जसा जगत का सुरु से, जेके परमेसर ने सिरज्यो, अभी तक नी तो होयो अने नी फेर कदी होयगा। ^{२०}अने अगर परभु ने उना दनहुंण के घटाइया नी होता, तो कंई को बी जीव नी बचतो, पण उना छांट्या होया की वजासे जिणके उने छांटी ल्या हे, उने इना दनहुंण के घटाइया।

^{२१}तो अगर कंई को तमार से के, देखो मसीह यां हे, 'या देखो उ वां हे, 'तो बिसास मती करजो; ^{२२}क्योके झुंटा मसीह अने झुंटा नबी उठ्यायगा, अने सेलाणी अने अनोखा काम बताइेगा के अगर हुई सके तो छांट्या होया के बी भटकई दे। ^{२३}पण होसियार री जो; देखो, म्हने पेलांज तमारे सगळो कंई बताडी लाख्यो हे।

ईसु को पाछो आणो

(मती २४.२९-३१; लूका २१.२५-२८)

^{२४} पण उना दनहुंण माय, उना कळेस का बाद सूरज इन्दार्यो जायगा, अने चन्द्रमा अपणो उजाळो नी देगा, ^{२५} अने असमान से तारागण पडता रेगा, अने असमान की ताकतहुंण हलाडी जायगा। ^{२६} जदे लोग म्हारे मनख का बेटा के बडी सामरत अने म्हेमा का साते बादळाहुंण माय आतो देखेगा। ^{२७}उना बखत उ अपणा सरगदूतहुंण के मोकली के धरती का इना छोर से लई के असमान का उना छोर तक, चारी दिसाहुंण से अपणा छांट्या होया के भेळा करेगा।

अंजीर का झाड़ से सीख

(मती २४.३२-३५; लूका २१.२९-३३)

^{२८}"अंजीर का झाड़ से या मिसाल सीखो; जदे उकी डाळ नरम हुई जाय, अने उका माय कोंपळ हितवा लागे, तो तम जाणी लो हो के उनाळो कने हे। ^{२९}असतरे तम बी जदे इनी बातहुंण के होता देखो तो जाणी लीजो के उ कने हे बरण बारना पेज हे। ^{३०}हूं तमार से सांची कूं के जदत्तक ई बातहुंण पूरण नी हुई जाय इनी पीढी को अंत नी होयगा। ^{३१}असमान अने धरती टळी जायगा, पण म्हारा बचन कदी नी टळेगा।

० १३.२९ उ कने हे बरण बारना पेज हे; या उ कने हे, आवा सरु तय्यार हे।

† १३.१५-१६: लूका १७.३१ † १३.१९: दानियल १२.१; दरसन ७.१४

† १३.२४: यसायाह १३.१०; यहजेकेल ३२.७; योएल २.१०, ३१, ३.१५; दरसन ६.१२

† १३.२५: यसायाह ३४.४; योएल २.१०; दरसन ६.१३ † १३.२६: दानियल ७.१३; दरसन १.७

उना दन अने बखत के कई को नी जाणे

(मती २४.३६-४४)

३२[†] पण उना दन या उनी घडी का बारामें कई को नी जाणे, नी सरग का दूत, नीज हूं बेटो, पण सिरप पिता परमेसर।^{३३} सावधान हुई जाव, जागता रो अने पराथना माय लाग्या रो, क्योंकि तम नी जाणो के उ ठेराइयो बखत कदे अई जायगा।^{३४} यो उना मनख सरीको जो अपणो घर छोडी के जातरा पे बायरे गयो। अपणा दासहुंण के हक दई के उने हरेक के उको काम बताइयो अने नेपादार के जागता रेवा को हुकम द्यो।^{३५} इकासरु जागता रो - क्योंकि तम नी जाणो के घर को मालेख कदे आयगा, सांझे, आदी राते, या मुरगा का बांग देवा बखत या दन उगे -^{३६} कई असो नी होय के उ एक दम से अई के तमारे सोतो होयो पाय।^{३७} अने हूं जो तमार से कूं, उज सगळा से कूं: 'जागता री जो!' "

ईसु के मारी लाखवा की जुगत

(मती २६.१-५; लूका २२.१-२; योहन ११.४५-५३)

† फसह^१ अने बिना खमीर का १४ रोटा का परब सरु दो दन बाकी रई गया था; अने मुख-पुरोहित अने सासतरी इनी बात का ताक माय था के उके कसे छाने से पकड़ां अने मारी लाखां; २पण वी कई र्या था, "परब का

बखत नी, कई असो नी होय के लोगहुंण माय दंगो हुई जाय।"

ईसु पे अतर रेडणो

(मती २६.६-१३; योहन १२.१-८)

३[†] जदे वी बेतनिय्याह का सिमोन कोइया का घरे जिमवा बेठ्या था, तो वां एक बइरा संगमरमर का बरतन माय जटामांसी को अनमोल सुद्ध अतर लई के अई; अने उने उना बरतन के तोडी के अतर के ईसु का माथा पे कुडी लाख्यो।^४ पण थोडाक लोग खिसियई के माय-माय केवा लाग्या, "यो अतर कायसरु ढोळी लाख्यो? "क्योंके यो अतर तो तीन सो चांदी का सिक्काहुंण^५ से जादा दाम माय बेची के गरीब-गुरबाहुंण के द्यो जई सकतो थो।" अने वी इनी बइरा पे खिजवा लाग्या।

६पण ईसु ने क्यो, "उके छोडी लाखो, उके कायसरु परेसान करो हो? उने तो म्हारा गेले भलई करी हे।^७ क्योंकि गरीब-गुरबाहुंण तो सदा तमारा गेले रे हे, अने जदे तम चावो जदे उणका गेले भलई करी सकता हो, पण हूं तमारा गेले सदा नी रूंवां।^८ जितरो वा करी सकती थी, उने कर्यो, उने म्हारा गाइया जावा सरु पेलांज से म्हारी काया पे अतर मिळ्यो हे।^९ हूं तमार से सांची कूं के आखा जगत माय जां कई सुब-समिचार को परचार होयगा, वां इनी बइरा का इना काम को बखाण बी इकी रियाद माय कर्यो जायगा।"

^१ १४.१ फसह; सबद् भण्डार माय देखो। ^५ १४.५ तीन सो चांदी का सिक्काहुंण; एक जणा की एक बरस की मजुरी चांदी का सिक्काहुंण देखो मर्क. 6.37।

[†] १३.३२: मती २४.३६ [†] १३.३४: लूका १२.३६-३८ [†] १४.१: निरगमन १२.१-२७

[†] १४.३: लूका ७.३७-३८ [†] १४.७: नेम-बिधान १५.११

ईसु के पकड़वाणे सरु तय्यार

(मती २६.१४-१६; लूका २२.३-६)

१० इका बाद यहूदा इस्करियोती जो बारा चेलाहुंण माय से एक चेलो थो मुख-पुरोहित कने गयो के उके उणका हाते पकड़वई लाखे। ११ अने जदे उणने यो सुणयो तो वी खुस हुई गया, अने उके रुप्या देवा को बचन द्यो। तो उ बखत की हेर माय र्यो के उके कसतरे पकड़वई लाखे

फसह-भोज की तय्यारी

(मती २६.१७-२५; लूका २२.७-१४,

२१-२३; योहन १३.२१-३०)

१२ बिना खमीर का रोटा का परब का पेलां दन, जदे फसह का मेमणा को बलिदान कर्यो जातो थो तो उका चेलाहुंण ने उकासे पुछ्यो, "तू कां चावे के हम जई के थारा सरु फसह खावा की तय्यारी करां?"

१३ उने अपणा चेलाहुंण माय से दो के या कई के मोकल्या, "नगर माय जाव, अने एक मनख पाणी को गाग्र्यो उठाडी के लातो होयो तमारे मिळेगा; उका पाछे हुई जावजो; १४ अने जां उ जावे, उना घर का मालेख से किजो, 'गरु के हे, "म्हारा पांमणाहुंण के रुकवा की जगा कां हे जेका माय हूं अपणा चेलाहुंण का गेले फसह खडं?" १५ उ खुद तमारे एक बडी सजी-सजई अदरे की कोठडी दिखाडेगा, वां हमारा सरु तय्यारी करजो।"

१६ चेला चल्या गया अने नगर माय जई के जसो ईसु ने क्यो थो वसोज मिळ्यो, अने उणने फसह की तय्यारी करी।

१७ जदे सांझ हुई तो उ बारा चेलाहुंण का गेले आयो। १८ अने जदे वी बेठिके जिमी र्या था, तो ईसु ने क्यो, "हूं तमार से सांची कूं, तमारा माय से एक हे - जो म्हारा गेले जिमी र्यो हे - म्हारे पकड़वायगा।"

१९ वी उदास हुई गया अने एक-एक करी ने उकासे पुछवा लाग्या, "कई उ हूं हे?"

२० अने उने उणकासे क्यो, "उ बारा चेलाहुंण माय से एक हे जो म्हारा गेले एकज परात माय खाय हे। २१ क्योके हूं मनख को बेटो, जसो म्हारा बारामें लिख्यो हे, ठीकज हे; पण धिक्कार उना मनख पे जेका से हूं मनख को बेटो पकड़वायो जडं हे! उना मनख सरु भलो होतो अगर उको जनमीज नी होतो।"

परभु-भोज

(मती २६.२६-३०; लूका २२.१४-२०; १

कुरिन्थिहुंण ११-२३-२५; योहन १३.२१-३०)

२२ जदे वी जिमी र्या था, उने रोटा ल्यो अने आसीस मांगी के तोड्यो अने चेलाहुंण के दई के क्यो, "इके लो; या म्हारी काया हे।"

२३ फेर उने कटोरो ल्यो अने धन्यबाद करिके उणके द्यो अने उना सगळा ने उका माय से प्यो। २४ जदे उने उणकासे क्यो, "यो करार को म्हारो उ लोई जो नरा लोगहुंण सरु बिवाड्यो जाय हे। २५ हूं तमार से सांची कूं, हूं अंगूर को रस उना

† १४.१८: भजन संहिता ४१.९

† १४.२४: निरगमन २४.८; यरमियाह ३१.३१-३४

दन तक पाछो कदी नी पिठंवां, जदत्तक परमेसर का राज माय नवो नी प्यूं।"

२६भजन गावा का बाद वी जेतून परबत पे चल्या गया।

ईसु ने पतरस का इनकार की भविसबाणी करी

(मती २६.३१-३५; लूका २२.३१-

३४; योहन १३.३६-३८)

२७+ जदे ईसु ने उणकासे क्यो, "तम सगळा ठोकर खावगा, क्योके यो लिख्यो हे, 'हूं ग्वाळा के मारुंवां, अने गाडरहुंण तित्तर-बित्तर हुई जायगा।' २८+ पण हूं जिन्दो होवा का बाद तमार से पेलां, हूं गलील परदेस जठंवां।"

२९पतरस ने उकासे क्यो, "चाये सगळा छोडी लाखे तो छोडी लाखे, हूं नी छोडुंवां।"

३०जदे ईसु ने उकासे क्यो, "हूं थार से सांची कूं: आजज राते मुरगा का दो कावा बांग देवा से पेलां तू खुद तीन कावा म्हारे नकारेगा।"

३१पण पतरस दावा से यइज केतो र्यो, "चाय म्हारे थारा गेले मरनो बी पडे, फेर बी हूं थारे नी नकारुंवां!"

अने वी सगळा चेला यइज बात कई र्या था।

एखला माय पराथना

(मती २६.३६-४६; लूका २२.३९-४६)

३२अने वी 'गतसमनी' नामकी जगा माय आया; अने उने अपणा चेलाहुंण से क्यो, "तम यां बेठ्या रो, जदत्तक

हूं पराथना करूं।" ३३अने उने अपणा गेले पतरस, याकूब अने योहन के ल्या, अने उ घणोज दुःखी अने ब्याकुळ होवा लाग्यो। ३४अने उने उणकासे क्यो, "म्हारो हिरदो घणो उदास हे, यां तक के हूं मरवा पे हूं। यांज रुको अने जागता रो।"

३५फेर उ उणकासे थोडोक अगडे बड्यो अने जमीन पे पडी के पराथना करवा लाग्यो के हुई सके तो, या दुःख की घडी टळी जाय। ३६अने उ केवा लाग्यो, "हे अब्बा! हे पिता! थारा सरु सगळो कंई सबगो हे। यो प्यालो म्हार से इकाडी करी दे। फेर बी म्हारी नी पण थारी मरजी पूरण होय।"

३७अने उने अई के उणके सोता पाया अने पतरस से क्यो "सिमोन, तू सोइर्यो र्यो हे? कंई तू एक घडी बी नी जागी सक्यो? ३८जागता अने पराथना करता रो के तम अजमाइस माय नी पडो। आतमा तो तय्यार, पण काया कमजोर हे।"

३९अने उने पाछो जई के इनाज सबदहुंण माय पराथना करी। ४०अने उने पाछो अई के उणके सोता पाया क्योके उणकी आंखहुंण नीन्द से भरी थी, अने वी नी जाणता था के उके कंई जुवाब दां।

४१फेर उने तीसरी कावा अई के उणकासे क्यो, "कंई तम अबी तक सोइर्यो र्या हो अने अराम करी र्या हो? नरो हुई चुक्यो! घडी अइगी हे। देखो, हूं मनख को बेटो पापिहुंण का हाते पकडवायो जठं हे। ४२उठ्याव, चलां! देखो, म्हारो पकडवाणे वाळो कने हे!"



यहूदा ने चुम्मो दइके ईसु के पकड़ायो
(MRK १४.४५)

ईसु के पकड़यो जाणो

(मती २६.४७-५६; लूका २२.४७-

५३; योहन १८.३-१२)

४३ जदे उ या कइज र्यो थो तो यहूदा, जो बारा चेलाहुंण माय से एक थो, झट अई पौंच्यो, अने उका गेले तरवारहुंण अने लटठहुंण लई के एक बडीमेक भीड़ थी जेके मुख-पुरोहित, सासतरिहुंण अने बुडा-हाड़ाहुंण ने मोकल्या था। ४४ उका पकड़वाणे वाला ने या कई के सेलाणी दई थी, के जेको हूं चुम्मो लूं उ ईसुज हे; उके पकड़ी के होसियारी से लई के जावजो।

४५ वां पौंची के यहूदा ने झट ईसु कने जई के, क्यो, "रब्बी!" अने उके चुम्म्यो। ४६ जदेज उणने उके पकड़ी के

बन्दी बणई ल्यो। ४७ इका पे कने उब्या चेलाहुंण माय से एक ने तरवार खेंची के म्हापुरोहित का दास पे चलाडी अने उको कान काटी लाख्यो। ४८ ईसु ने जुवाब देता होया उणकासे क्यो, "कई तम तरवार अने लटठहुंण लई के म्हारे बन्दी बणावा आया हो? कई हूं कई को डाकू हूं? ४९ हूं तो तमारा गेले हरदन मन्दर माय परबचन द्या करतो थो अने तमने म्हारे नी पकड़यो, पण यो इकासरु होयो हे के पवित्तर सासत्तर को लिख्यो पूरण होया।"

५० इका पे सगळा चेलाहुंण उके एखला के छोडी ने भागी गया।

५१ एक जुवान उका पाछे-पाछे चली र्यो थो। उ अपणी नांगी काया पे सिरप मलमल को चादर ओड़यो होयो थो। उणने उके पकड़यो, ५२ पण उ मलमल को चादर छोडी के नांगोज भागी गयो।

ईसु की पेसी

(मती २६.५७-६८; लूका २२.५४-५५,६३-

७१; योहन १८.१३-१४,१९-२४)

५३ वी ईसु के म्हापुरोहित कने लई गया: अने सगळा मुख-पुरोहित, बुडा-हाड़ा अने सासतरी भेळा हुई गया। ५४ पतरस दूराज दूरा से म्हापुरोहित का आंगणा तक उका पछड़े-पछड़े चल्यो गयो थो। उ नेपादारहुंण का गेले बेठिके वां भस्ते तापवा लाग्यो। ५५ म्हापुरोहित अने सगळी म्हासबा ईसु के मारी लाखवा सरु उका बिरोद माय गवा दुंडवा की कोसिस करता र्या, पण उणके कई को बी गवा नी मिळ्यो।

† १४.५५ म्हासबा; यहूदिहुंण का ७० धरम का नेताहुंण की सबा।

† १४.४९: लूका १९.४७, २१.३७

५६क्योंके नरा लोगहुंण उका बिरोद माय झुंटी गवई दई र्या था, पण उणकी गवई एक-दूसरा से मिळी नी री थी।

५७जदे थोडाक लोग उबा हुई के उका बिरोद माय या गवई देवा लाग्या, ५८ "हमने इके यो केता सुण्यो हे, हूं हातहुंण से बणाया इना मन्दर के ढळ्डी लाखुवां अने तीन दन माय दूसरो उबो करी दूवां जो हात को बणायो होयो नी रेगा।" ५९इका पे बी उणकी गवई एक सरीकी नी थी।

६०फेर म्हापुरोहित उठ्यो अने उने अगड़े अई के ईसु से पुछ्यो, "जो गवई ई लोगहुंण थारा बिरोद माय दई र्या हे कंई तू इको जुवाब नी दे?"

६१पण उ छानो र्यो अने उने कंई को जुवाब नी द्यो। म्हापुरोहित ने पाछो उकासे यो केता होया पुछ्यो, "कंई तू उना धन्य परम परधान परमेसर को बेटो मसीह हे?"

६२ ईसु ने क्यो, हूं हे! अने तम म्हारे मनख का बेटा के सरवसक्तिमान का सुदा हाताडी बेट्यो होयो अने सरग का बादळाहुंण का गेले आता होया देखोगा।"

६३इका पे म्हापुरोहित ने अपणा लतरा फाडी के क्यो, "अबे हमारे हजु गवाहुंण की कंई जरुवत? ६४ तम या निंदा सुणी चुक्या हो। इका पे तमारी कंई राय हे?"

अने उण सगळा ने उके मोत की सजा का लायक दोषी ठेराइयो।

६५जदे थोडाक उका पे थुकवा लाग्या, अने उकी आंखहुंण पे पट्टी बान्दी

के मुक्का मारवा लाग्या अने उकासे केवा लाग्या, "भविसबाणी कर!" अने नेपादारहुंण ने पकड़ी के उका मुन्डा पे थापड़ मार्या।

पतरस ने ईसु के नकार्यो

(मती २६.६९-७५; लूका २२.५६-६२;

योहन १८.१५-१८, २५-२७)

६६जदे पतरस निच्चे आंगणा माय थो, तो म्हापुरोहित की दासिहुंण माय से एक वां अई, ६७अने पतरस के भस्ते तापतो देख्यो अने उका पे नगे गडई के केवा लागी, "तू बी तो ईसु नासरी का गेले थो।"

६८पण उने मना करता होया क्यो, "हूं नी तो जाणूं अने नीज समजुं के तू कंई कंई री हे।" अने उ बायरे ओसारा माय चल्थो ग्यो। इका बाद मुरगा ने बांग दई।

६९उके देखी के कने उब्या लोगहुंण से वा दासी पाछी केवा लागी, "यो तो उणका दळ माय को एक हे!" ७०पण उने पाछो नकार्यो।

थोडिक देर बाद जो कने उब्या था उणने पाछो पतरस से क्यो, "पक्कोज तू उणका माय को एक हे, क्योंके तू गलील को हे।"

७१पण उ कोसवा अने सोगन खावा लाग्यो, "हूं इना मनख के जेकी तम चरचा करी र्या हो नी जाणूं।"

७२अने झट मुरगा ने दूसरी कावा बांग दई। जदे पतरस के वा बात जो ईसु ने

* १४.६४ निंदा; खुद के परमेसर का बराबरी करिके इने परमेसर की निंदा करी। ' १४.६८ इका बाद मुरगा ने बांग दई; थोडाक हात का लिख्या लेखहुंण माय असो नी हे।

† १४.५८: योहन २.१९

† १४.६२: दानियल ७.१३

† १४.६४: लेव्यव्यवस्था २४.१६

पतरस से कई थी, रियाद अई, "मुरगा का दो कावा बांग देवा से पेलां तू तीन कावा म्हारे नकारेगा।" अने पतरस रोवा लाग्यो।

पिलातुस का सामे हाजिर

(मती २७.१-२, ११-१४; लूका

२३.१-५; योहन १८.२८-३८)

अने दन उगताज, झट मुख-
१५ पुरोहितहुंण अने बुडा-हाडाहुंण, सासतरिहुंण अने आखी म्हासबा का गेले फेसलो कर्यो, अने ईसु के बान्दी के लई गया अने उके पिलातुस का हाते दई द्यो। २पिलातुस ने उकासे पुछ्यो, "कई तू यहूदिहुंण को राजो हे?"

ईसु ने जुवाब देतो होयो उकासे क्यो, "तू खुदज कई र्यो हे।"

३अने मुख-पुरोहित उका पे नरी बातहुंण को आरोप लगाडी र्या था। ४पिलातुस ने उकासे या केता होया पाछो पुछ्यो, "कई तू जुवाब नी दई र्यो? देख, वी थारा बिरोद माय कितरा आरोप लगाडी र्या हे।"

५पण ईसु ने कई को हजु जुवाब नी द्यो - इका से पिलातुस के अचरज होयो।

पिलातुस ईसु के छोड़वा माय नाकाम

(मती २७.१५-२६; लूका २३.१३-२५;

योहन १८.३९-१९.१६)

६परब का बखत पिलातुस उणकी मांग पे कइका एक मुलजिम के छोड़्या करतो थो। ७अने उना बिदरोहिहुंण का गेले जिणने दंगा का बखत हत्या करी थी बरअब्बा नाम को एक मनख बी

केद कर्यो थो। ८अने भीड अदरे जई के पिलातुस से बिणती करवा लागी, के जसो तू करतो आयो हे, वसोज हमारा सरु कर। ९तो पिलातुस ने उणके जुवाब द्यो, "कई तम चाव के हूं यहूदिहुंण का राजा के तमारा सरु छोडी राखु?" १०क्योंके उ जाणतो थो के मुख-पुरोहितहुंण ने उके जळण की वजासे पकड़वायो हे।

११पण मुख-पुरोहितहुंण ने भीड के यो केवा सरु उकसाइयो के पिलातुस ईसु का बदळा माय बरअब्बा के छोडी लाखे। १२पिलातुस ने पाछो पुछ्यो, "तो जेके तम यहूदिहुंण को राजो को हो उको हूं कई करु?"

१३वी पाछा चिल्लाइया, "उके कुरुस पे चडाव!"

१४पिलातुस ने उणकासे क्यो, "कायसरु? उने कई बुरो कर्यो हे?"

पण वी हजु बी जोर से चिल्लाइया, उके कुरुस पे चडाव।"

१५तो पिलातुस ने भीड के खुस करवा की मनसा से बरअब्बा के उणका सरु छोडी लाख्यो, अने ईसु के कोडा लगाडिके कुरुस पे चडावा सरु रोमी सिपईहुंण के दई द्यो।

सिपईहुंण की मसकरी

(मती २७.२७-३१; योहन १९.२-३)

१६सिपई उके किला का भितरे याने राजपाल का मेळ माय लई गया, अने वां उणने आखी रोमी पळटन के बुलाडी के भेळी करी ली। १७उणने उके बेंगणी रंग को लतरो पेरायो अने कांटा को मुगुट गुंथिके उका माथा पे धर्यो। १८अने वी

उको मान पाइवा लाग्या: हे यहूदिहंण का राजा, थारी जे होवे!" १९वी उका माथा पे बरु मारता अने उका पे थुंकता र्या, अने गोडा टेकी के उके मजाक माय परणाम करी र्या था। २०जदे वी उको मजाक बणई चुक्या तो बेंगणी रंग का लतरा के उतारी के उणने उकाज लतरा उके पेरई द्या। अने वी उके कुरुस पे चड़ावा सरु बायरे लई ग्या।



सिपईहंण को मजाक (MRK १५.२०)

ईसु के कुरुस पे चड़ायो जाणो

(मती २७.३२-४४; लूका २३.२६-

४३; योहन १९.१७-२७)

२१+ अने उणने उके सिकन्दर अने रफुस को पिता सिमोन जो कुरेनी

गांम से अई र्यो थो, बेगारी माय पकड़यो के ईसु का कुरुस के उठई के लई चले। २२अने वी उके 'गुलगुता' नामकी जगा पे लाया, जेको अरथ हे 'खोपड़ी की जगा'। २३अने उणने उके लुबान मिळ्यो होयो अंगूर रस देवा की कोसिस करी; पण उने नी ल्यो। २४+ अने उणने उके कुरुस पे चड़ायो अने चिट्ठिहंण लाखी, के किके कई मिळे, उका लतराहंण के माय-माय बांटी ल्या। २५जदे उणने उके कुरुस पे चड़ायो तो सवरे का नो बजी चुक्या था। २६अने उका माथा का अदरे दोष-पत्र पे यो लिख्यो थो, "यहूदिहंण को राजो " २७उणने उका गेले दो डाकूहंण के बी कुरुस पे लटकाइया, एक के जीवणा हाताड़ी अने दूसरा के डाबा हाताड़ी। २८+ तो पवित्तर सासत्र को उ बचन पूरण होयो जेका माय यो लिख्यो, "उ कसूरवारहंण का गेले गिण्यो ग्यो।" +

२९+ अने वां से आवा-जावा वाळा उकी निंदा करता होया अने माथो हलाड़ी-हलाड़ी के केवा लाग्या, अरे! मन्दर का ढळडाणे वाळा अने तीन दन माय बणावा वाळा, ३०अपणे खुद के बचाइ अने कुरुस से उतर्या!"

३१असतरे म्हापुरोहित बी सासतरिहंण का गेले मिळी के माय-माय उको मजाक उडई के यो कई र्या था, "इने दूसराहंण के बचाइया; पण अपणे खुद के नी बचई

“ १५.२२ गुलगुता; खोपड़ी (कपाळ) सरीको नानो टेकरो। + १५.२८ थोडाक हात से लिख्या होया लेख माय २८ आयत जोडी हे। (देखो लूका २२.३७)।

† १५.२१: रोमिहंण १६.१३ † १५.२४: भजन संहिता २२.१८ † १५.२८: यसायाह ५३.१२

† १५.२९: भजन संहिता २२.७, १०९.२५; मरकुस १४.५८; योहन २.१९

सकतो। ^{३२}अबे यो मसीह, इसराइल को राजो, कुरुस पे से निच्चे उतर्या के हम देखी के बिसास करा!"

अने वी दोई बी जो उका गेले कुरुस पे लटकाइया था, असाज उकी निंदा करी र्या था।

ईसु की मोत

(मती २७.४५-५६; लूका २३.४४-

४९; योहन १९.२८-३०)

^{३३}जदे दफोर का बारा बजिग्या तो आखा देस माय इन्दारो छई ग्यो अने तीन बज्या दन तक छायो र्यो। ^{३४} अने तीन बजवा पे ईसु ने घणा उंचा बोल माय चिल्लाडी के क्यो, "इलोई, इलोई, लमा सबकतनी?" जेको अरथ, हे म्हारा परमेसर, हे म्हारा परमेसर, तने म्हारे कायसरु छोडी लाख्यो?"

^{३५}तो जो कने उव्या था उणका माय से थोडाक या सुणी के केवा लाग्या, देखो, उ एलियाह के तेडी र्यो हे।" ^{३६} अने कइंका ने दोडी के पाणी चुसवा वाळी चीज के सिरका माय डुबाडी, अने उके बरु पे धरी के उके चुसाइयो अने केवा लाग्या, देखां एलियाह उके निच्चे उतारवा सरु आवे के नी।"

^{३७}तो ईसु ने घणी उंची अवाज से चिल्लाडी के पराण छोडी लाख्या।

^{३८} अने मन्दर को परदो अदरे से निच्चे तक फाटी के दो बटका हुई ग्यो। ^{३९}जदे सुबेदार ने जो वां सामे उव्यो थो उके असतरे पराण छोडता"

देख्यो तो क्यो, "बेसक यो मनख परमेसर को बेटो थो!"

^{४०} थोडिक बइराहुंण बी थी जो दूरा से देखी री थी, उणका माय मरियम मगदलीनी, अने छोटा याकूब अने योसेस की मेतारी मरियम, अने सलोमी थी। ^{४१}जदे उ गलील माय थो तो ई उका पछडे-पछडे चल्या करती अने ईसु की सेवा-चाकरी कर्या करती थी; अने दूसरी नरी बइराहुंण बी थी जो ईसु का गेले यरुसलेम अई थी

ईसु के गाइयो जाणो

(मती २७.५७-६१; लूका २३.५०-

५६; योहन १९.३८-४२)

^{४२}जदे सांज हुई, तो तय्यारी का दन होवा की वजासे, याने सबत् से एक दन पेलां, ^{४३}अरमतियाह को रेवासी यूसफ आयो, जो म्हासबा को एक इज्जतदार मनख थो। उ खुदज परमेसर का राज की बाट जोई र्यो थो। उने हिम्मत करिके पिलातुस का सामे जई के ईसु की लोथ मांगी। ^{४४}पिलातुस के घणो अचरज होयो के ईसु की मोत झट हुई गी, अने उने सुबेदार से तेडी के पुछ्यो, "कंई उ मरी चुक्यो?" ^{४५}फेर उने सुबेदार से इकी जांच करवई के यूसफ के लोथ दई दी। ^{४६}तो यूसफ ने मलमल को लतरो मोल ल्यो अने लोथ के उतारी के उका माय लपेटी, अने एक कबर माय जो सिल्ला माय कोरी के बणई थी धरी दी, अने कबर का मुन्डा पे एक भाटो रडकई के

" १५.३९ पराण छोडता; मूल माय उ जोर से चिल्लाइयो अने पराण छोडी लाख्या।

* १५.३४: भजन संहिता २२.१

* १५.३६: भजन संहिता ६९.२१

* १५.३८: निरगमन २६.३१-३३

* १५.४०-४१: लूका ८.२-३

लगाड़ी लाख्यो। ४७ मरियम मगदलीनी अने योसेस की मेतारी मरियम देखी री थी के उके कां धर्यो हे।

ईसु को जी उठणो

(मती २८.१-८; लूका २४.१-१२; योहन २०.१-१०)

जदे सबद् बितवा पे, मरियम १६ मगदलीनी, याकूब की मेतारी मरियम अने सलोमी ने काया पे मळवा सरु मुसालो मोल ल्यो के अई के ईसु की लोथ पे मळे। २ अने हफ्ता का पेलां दन सबेरे-सबेरे दन हिटताज वी कबर पे अई। ३ वी माय-माय कई री थी, कुण हमारा सरु कबर का मुन्डा से सिल्ला सरकायगा?" ४ जदे उणने नगे उठाडी के देख्यो के सिल्ला नरी मोटो होवा पे बी कबर पे से सरकी हुई हे। ५ कबर माय जावा पे उणने एक जुवान के धोळा लतरा पेर्यो सुदा हाताडी बेठ्यो देख्यो; अने वी दंग रई गी।

६ सरगदूत ने उणका से क्यो, "चौको मती। तम ईसु नासरी के जो कुरुस पे



बइराहुंण ने कबर माय सरगदूत के देख्यो
(MRK १६.५)

लटकाइयो थो, हुंडी री हो। उ जिन्दो हुई ग्यो हे। यां हयनी। देखो, याज वा जगा हे जां उणने उके धर्यो थो। ७ पण जाव, उका चेलाहुंण अने पतरस के बताडो के उ तमार से पेलां गलील जायगा अने तम उके वां देखोगा, जसो के उने तमार से क्यो थो।"

८ वी वां से हिटी अने कबर से पाटी दई, क्योके धुजणी अने अचरज उणका पे छई ग्यो थो; अने उणने कइंका से बी कइंनी क्यो, क्योके वी डरी गी थी।

एक पुराणा परिच्छेदः

१६.९-२०

थोडाक चेलाहुंण के दरसन

(मती २८.९-१०; योहन २०.११-१८)

[९ जिन्दा होवा का बाद हफ्ता का पेलां दन घणा सवेरेज, ईसु सगळा से पेलां मरियम मगदलीनी के जेका माय से सात बुरी आतमाहुंण हेडी थी नगे आयो। १० उने जई के यो समिचार ईसु का चेलाहुंण के सुणायो, जो दुःख माय डुब्या होया था अने रोई र्या था। ११ जदे उणने यो सुणयो के उ जिन्दो हे अने उणके नगे आयो तो उणके बिसासज नी होयो।

दो चेलाहुंण के नगे आणो

(लूका २४.१३-३५)

१२ इका बाद उ दूसरा रूप माय उणका माय से दो के जदे वी गांम आडी जई

* १६.९-२० कई लेखनहुंण माय आयत ९ से २० तक नी हे।

† १६.७: मती २६.३२; मरकुस १४.२८

र्या था, नगे आयो। ^{१३}उणने जई के दूसरा के बी यो समिचार द्यो, पण उणने बी बिसास नी कर्यो।

चेलाहुंण से बात-चित

(मती २८.१६-२०; लूका २४.३६-४९;

योहन् २०.१९-२३ परेरितहुंण १.६-८)

^{१४}बाद माय ईसु उना ग्याराहुंण के बी जदे वी जिमवा बेठ्या था, नगे आयो; अने उणका अबिसास अने हिरदा का काठापण पे उणके डांट्या, क्योके उणने उको बिसास नी कर्यो थो जिणने उके जी उठवा का बाद देख्यो थो। ^{१५} अने उने उणका से क्यो, "तम आखा जग माय जाव अने आखी धरती पे सुब-समिचार परचार करो। ^{१६}जो बिसास करे अने बपतिसमो ले उ उध्दार पायगा, पण जो बिसास नी करे उ दोषी ठेराइयो जायगा। ^{१७}अने बिसास करवा वाळाहुंण माय या सेलाणी नगे आयगा: म्हारा नाम से वी बायरबादाहुंण हेडेगा, अने नवी-नवी भासाहुंण बोलेगा; ^{१८}वी सरपहुंण के उठाडी लेगा अने अगर वी पराण नासक जेर बी पी जावे तो इका

से उणको नुकस्यान नी होयगा; वी बेमारहुंण पे हात धरेगा अने वी नज हुई जायगा।"

ईसु के सरग पे उठाडी ल्यो जाणो

(लूका २४.५०-५३; परेरितहुंण १.९-११)

^{१९} तो जदे परभु ईसु उणकासे बातहुंण करी चुक्यो, तो उके सरग माय उठई ल्यो, अने परमेसर का सुदा हाताडी बेठी ग्यो। ^{२०}अने चेलाहुंण ने जई के सगळी जगा परचार कर्यो। अने परभु उणका गेले काम करतो र्यो, अने बचन के उना अचरज का कामहुंण का गेलेज-गेल जो होता जई र्या था सच्चई कायम करतो र्यो।]

एक दूसरा परिच्छेद (९-२०)^१

[^१अने झट बइराहुंण ने पतरस अने उका सातिहुंण के यो सगळो निरदेस सुणई द्यो। ^{१०}अने उका बाद ईसु ने खुद अनन्त उध्दार का पवितर अने कदी खतम नी होवा वाळा सुब-समिचार के चेलाहुंण से उगणूं से आथणूं तक परचार करायो।]

^१ १६.२० एक दूसरा परिच्छेद माय मरकुस का सुब-समिचार को अंत असो कर्यो हे (९-२०)।

^१ १६.१५: परेरितहुंण १.८ ^१ १६.१९: परेरितहुंण १.९-११